

四庫全書總目

上海大東書局印行

第三十三册

卷一百八十二

別集類存目九

卷一百八十三

別集類存目十

卷一百八十四

別集類存目十一

卷一百八十五

別集類存目十二

欽定四庫全書總目卷一百八十二

集部三十五

別集類存目九

萬山樓詩集二十四卷

江西巡撫採進本

國朝許虬撰虬字竹隱長洲人順治辛卯舉人官至思南府知府其詩前數卷多擬古之作刻意摹仿頗嫌太似

其擬陸機迢迢牽牛星詩後有自跋曰子已於十九首中和此題矣今復因曙戒之訂其和陸平原篇成自詠一

過確是晉古非漢古也詩之升降微矣觀其持論知無往非雙鉤古帖也

萬青閣全集八卷

內府藏本

國朝趙吉士撰吉士有續表忠記已著錄是集為吉士所自編凡雜文二卷詩一卷勒河詩紀等十三種其一卷

制藝一卷平交山寇公讀詩文一卷獻贖一卷交山在交城境姜瓖平後餘孽竄伏山中出沒為患吉士以計討

平之材略有足稱者文章則非專門也

林臥遙集三卷

浙江巡撫採進本

國朝趙吉士撰康熙戊辰吉士由戶科給事中罷職閑居僑住宣武門西之寄園適金壇于漢翔貽詩四首吉士依

韻酬答後凡遇他題皆疊此韻積成千首命曰疊韻千律分為上下二卷尋又續得五百餘首編為一卷命曰千疊

波餘合刻以為此編案和韻為詩本不能曲折如志又疊至千五百首此雖香山東坡亦斷無能工之理矣

遂初堂文集九卷

江蘇巡撫採進本

國朝楊兆魯撰兆魯字青巖武進人順治壬辰進士官至福建延平道按察司副使兆魯官建寧時巨寇蕭維堂等

作亂兆魯招撫有功集中平寇紀略述其始末頗詳惟多載案牘之文詞不雅馴

畫壁遺業一卷

通行本

國朝范承謨撰承謨有忠貞集已著錄康熙壬子承謨總督閩浙值逆藩耿精忠謀反巡撫劉秉政輸情於賊給承謨入見脅令從逆承謨詆罵不屈遂為所拘繫被幽者三載備受窘辱時作為詩歌以自抒忠憤守者屏絕筆墨乃以椽炭畫字壁上其尤激烈者輒為賊黨壞去僅存四十七首承謨自為之序已彙載入忠貞集中此乃石門吳震方錄入說鈴之本也

見山樓詩文集無卷數 陝西 巡撫採進本

國朝楊素蘊撰素蘊有西臺奏議已著錄其詩集刻於康熙壬子文集則無序無跋不知刻於何時均不分卷帙不列目錄皆似乎隨有所作隨以付雕其詩頗摹李夢陽文則皆應俗之作也

撫皖治略一卷撫楚治略一卷穀城水運紀略一卷陝西巡撫 採進本

國朝楊素蘊撰撫皖治略乃其官安徽巡道時條敘奏疏撫楚治略皆其官湖廣巡撫時條敘奏疏穀城水運紀略則素蘊官荆南道時會 大軍勦逆藩吳三桂兵備陸運頗艱因訪明季楊嗣昌勦張獻忠時水運故道修復陸路

衷其文移以成是編素蘊為御史時會疏劾吳三桂號為敢言此三書則皆尋常案牘也中多奏疏宜入奏議類中而文告居其大半故仍附之別集類焉

張康侯詩草十一卷陝西巡撫 採進本

國朝張晉撰晉字康侯狄道人順治壬辰進士官丹徒縣知縣其詩頗學李白兼及李賀之體第一卷為黍谷吟第二卷為秋舫一嘯第三卷為薊門篇第四卷為勞勞篇第五卷為石芝山房草第六卷七卷為雍草第八卷為稅雲草而以詩餘附焉第九卷為律陶集陶詩為五言律也第十卷為集杜 第十一卷為集唐亦皆五言律據後跋云尚有七律集句未經編入云

慈齋存彙四卷陝西巡撫 採進本

國朝白乃貞撰乃貞字廉叔號藥淵順治壬辰進士官翰林院檢討其詩敘述真樸不加文飾故余恂序以為善

學者山蓋舉其近似者爾

堪齋詩存八卷 江蘇周厚培家藏本

國朝顧大申撰大申字震雉一字見山華亭人順治壬辰進士官至工部郎中大申初與同郡王廣心周茂源朱徵輿諸人唱和後又與施閏章相酬答所作有鶴巢集又有燕京倡和及酒亭諸集後自刪併為此集故曰詩存陳伯璣撰國雅集稱其樂府於古人可謂毫髮無遺憾七律高華可追王季今觀其集大抵襲明七子之餘風可追王李庶乎近之至於樂府則談何容易也

學源堂文集十八卷 直隸總督採進本

國朝郭棻撰棻字快圃清苑人順治壬辰進士官至翰林院侍讀學士其文頗為華瞻惟酬應之作太多未免失於刪汰棻曾修畿輔志及保定府志今集內所載星野沿革等說皆志中之文益用鄂州小集載新安志序之例也

蓮龕集十五卷 江西巡撫採進本

國朝李來泰撰來泰字仲章號石臺臨川人順治壬辰進士官工部虞衡司主事康熙己未召試博學鴻詞授翰林院侍講其制藝才藻富豔有幾社之餘風詩古文則不逮也

司勳五種集二十卷 副都御史黃登賈家藏本

國朝王士祿撰士祿有讀史蒙拾已著錄是集一曰表餘堂詩存二卷一曰十笏草堂詩選九卷一曰辛甲集七卷一曰上浮集二卷皆古今體詩一曰炊聞卮語二卷則詞也然表餘堂詩存未刻刻者實止四種耳

天延閣詩前集十六卷後集十三卷附花果會唱和詩一卷贈言集四卷 內府藏本

國朝梅清撰清字潤公號瞿山宣城人順治甲午舉人是編分前後二集前集分十六編一曰樂府二曰稼園草三曰新田集四曰燕征草五曰宛東草六曰休夏集七曰塵塵集八曰越游草九曰匪琴集十曰寒江集十一曰

歸舟集十二曰嶽雲集十三曰梅花溪上集十四曰雪廬草十五曰菊間草十六曰唱和詩以一集為一卷卷各有序後集編年分十三卷自康熙甲寅至戊辰或以一年為一卷或以二年為一卷末附花果會唱和詩一卷贈言四卷則皆同人讌游酬答之作也

瞿山詩略三十三卷

安徽巡撫採進本

國朝梅清撰情舊刻有天延閣前後集皆七十以前之作版燬於火故又取未刻三卷合而編之以成此本

飲和堂集二十一卷

浙江巡撫採進本

國朝姚鼐撰雙字曾師號成菴山陰人順治甲午舉人官安化縣知縣是集凡詩十三卷曰梅軒草公車草歷游草天都草金谿草金谿又草叱馭草思唐草思唐又草三草四草五草東行草每一集為一卷雜文八卷則分體編次其詩流易有餘頗傷固熟文亦肉多於骨若十二種功德連珠等作尤墮入纖巧一派矣

陳亭詩略一卷

福建巡撫採進本

國朝林堯光撰堯光字觀伯莆田人順治中以選拔貢生官行人司行人近鄭王臣遠蒲風清續集謂堯光伯仲詩各臻妙境而堯光尤秀拔當為馬氏白眉然所作亦頗涉纖麗於元人蹊徑為近也

浣亭詩略二卷浣亭歸來吟一卷附山蘊花堦長短句一卷

福建巡撫採進本

國朝林堯華撰堯華字開伯莆田人順治甲午舉人官榆次縣知縣是集浣亭詩略二卷皆早年所作浣亭歸來吟一卷皆罷官以後所作山蘊花堦長短句則附載其詞集也其詩集編次頗為叢雜如詩略中有詠園花十四首歸來吟中有詠園花四首而其中醱醱一首一字不易殆校勘之疎歟其詩才氣雋爽早年刻意雕鐫而未造

渾成晚年又頗涉頽唐縱筆太早其詞有南宋人格意而罕睹新聲亦擬議而未變化也

託素齋集十卷

浙江巡撫採進本

國朝黎士宏撰士宏字媿曾長汀人順治甲午舉人官至陝西布政司參議是集詩四卷文六卷詩集凡四刻文

集凡三刻蓋積數年而彙為一冊故每刻各體皆備士宏沒後其子文遠復合而刊之自序稱少時詩好李賀文

好王勃今觀集中諸作大抵多宋人末派絕無一篇與子安長吉相近者蓋嗜好難薦而才地則與之不近也

漣漪堂遺藁二卷

浙江巡撫採進本

國朝沈峻曾撰峻曾字蘇菴仁和人順治甲午副榜貢生是集為晉安林雲銘所選定上卷為雜文下卷為詩末附雜言數十條皆談理之語頗近陳繼儒小品

半農齋集八卷

兩江總督採進本

國朝蔣中和撰中和字本達又字眉三靖江人順治乙未進士官蘭陽知縣遷滄州州判是集分詩文論策史說六部其文頗辨博自喜而多拾李贄餘論未脫明李町畦也

陸密菴文集二十卷錄餘二卷詩集八卷詩餘四卷

浙江鄞大節家藏本

國朝陸求可撰求可字咸一淮安人順治乙未進士官至刑部郎中其古文頗疎暢而機調多類時藝詩詞亦酬應之作居多

鶴嶺山人詩集十六卷

浙江巡撫採進本

國朝王澤宏撰澤宏字涓來黃岡人順治乙未進士官至禮部尚書是集乃其子材振所編前三卷皆題已刻詩若干首蓋皆澤宏舊作嘗為魏憲錄入石倉詩選者四卷以下用編年體自丁巳迄庚辰題某年詩若干首附註曰未刻彙則材振所哀輯也前有魏憲原序又附其祖用子傳一篇及澤宏請復九江闢一疏澤宏喜與諸名士游王士禎姜宸英洪昇等皆嘗點定其詩所作類皆和平安雅不失臺閣氣象而骨體未堅醞釀未厚尚不能凌轍一時

恥躬堂文集二十卷

江西巡撫採進本

國朝王命岳撰命岳字伯咨號恥古晉江人順治乙未進士官至刑科都給事中是集自卷一至卷五為奏疏卷

六至卷十七為雜文卷十八為詩卷十九為周易雜卦爻中天卷二十為讀詩隔中天據其自序謂辛卯冬夢文王周公先後車蓋鳴道甚盛命岳自隔中窺視故以名也其書分十二篇大旨謂易雜卦無錯簡而以互卦之法推求其義讀詩凡五十條皆標識簡端之語一篇或止一兩句如讀簡兮曰使我懷古之情更深讀王風曰大車之淫甚於丘麻丘麻淫人大車淫鬼尤非說經之正軌也

澹餘軒集八卷

山東巡撫採進本

國朝孫光祀撰光祀字作庭號溯玉歷城人順治乙未進士官至兵部侍郎是集凡文七卷詩一卷

南沙文集八卷附錄一卷

浙江巡撫採進本

國朝洪若臯撰若臯字虞隣臨海人順治乙未進士官至福建按察司僉事是集凡詩一卷文六卷其文頗以恢奇自喜然縱橫太過附錄一卷乃其鄉會試中式制藝蓋用吳伯宗榮進集例也

縣津山人詩集十八卷附楓香詞一卷綠蕭草堂詩一卷

內府藏本

國朝宋學撰學有滄浪小志已著錄學所作詩有古竹園臺有嘉禾堂有柳湖草有將母樓臺有和松菴臺有都官草有雙江倡和集有回中集有西山倡和詩有續都官草有海上雜詩有漫堂草有漫堂倡和詩又有漫堂草凡十四集大抵沿明季詩社之習旋得旋刊出之太早故利鈍不免互見此集則學為江西巡撫時重自刪汰併為一編而仍存諸集之舊目故有六首為一卷者視舊集為精簡矣前有汪琬劉榛二序榛序以種樹為喻言方其初植雖一病葉不忍摘久之而繁枝茂焉又久之而岐幹斲焉亦篤論也宋楊萬里陸游竝一代巨擘而萬里誠齋集游劍南詩金磔混淆往往為後人口實豈非愛不能割依違牽就至是乎後學自定西陂類彙凡此集之詩皆不收毋亦學與年進悔其少作歎後附緯蕭草堂詩一卷乃其子翰林院編修至所作才力殆又亞於學

馬

精華錄訓纂十卷

大理寺卿陸錫龍家藏本

國朝王士禎撰惠棟註士禎有古懽錄棟有易漢學皆已著錄士禎晚年仿宋黃庭堅精華錄例自定其詩爲此
本棟祖周揚爲士禎門人故棟亦仿任淵史季溫例註之以引證浩繁每卷各分爲上下其凡例稱所採書其數
百餘種悉從本書中出不敢一字拾人牙後慧然亦大驚言之耳卽以第一卷而論如溫庭筠觀狀錄蔡寶漢官
典職孫氏瑞應岡陸機洛陽記沈懷遠南越志蔡邕琴操河圖括地象顧野王玉篇案今太廣益會玉篇乃宋大
王之前非
孫強之書輿地志管輅別傳梁京寺記檀道鸞續晉陽秋十二書宋以來久不著錄棟何由見本書哉棟凡引
已佚書者皆冠以現存書名
如藝文類聚太平御覽之類又棟遠於經學於詞賦所涉頗淺所引或不得原本於顯然其見者或有遺漏如註
寒肌起粟字引蘇軾旅館孤眠體生粟句不知此用軾雪詩凍合玉樓寒起粟句也註吹香字引李賀山頭老桂
吹古香句不知此用李頎愛敬寺古藤歌密葉吹香飯僧徧句也註麥飯字引劉克莊漢寢唐陵無麥飯句不知
爲五代史家人傳語也註大漢字引程大昌北邊備對不知爲後漢書竇憲傳語也至於每條既各自標目則其
文不相連屬乃於數條共引一書者不另標名如轅固里詩註曲學字曰今上初卽位云云蓋蒙上條史記之文
然不標史記而首句突稱今上是何代之帝也其體例亦間有未善案以上亦始舉
第一卷言之是書先有金榮箋註盛行於
時棟書出而榮書遂爲所軋要亦勝於金註耳至於元元本本則不及其話經之書多矣人各有能有不能不必
以此註而輕棟亦不必以棟而併重此註也

漁洋詩集二十二卷續集十六卷

山東巡撫
採進本

國朝王士禎撰士禎初刻落磯堂詩又刻順治丙申至辛丑所作爲阮亭詩復有過江入吳白門前後諸集後乃刪
併諸作定爲漁洋前集始於丙申終於康熙己酉凡十四年之詩是集出而少作諸集悉微故今不甚傳康熙甲
子又哀其辛亥至癸亥之詩十六卷爲漁洋續集蓋其爲詹事時也其時菁華方盛與天下作者馳逐於名故平
生刻意之作見於二集者爲多焉

漁洋文略十四卷

山東巡撫
採進本

國朝王士禎撰蓋康熙乙亥士禎所自編前有其門人張雲章序士禎以詩名一時而古文特以天姿明悟自然
修潔實則非所專門雲章序謂以先生為今之太白子美輩知非溢美矣語以先生之文昌黎柳州之文也容有
或信或不信者蓋當時公論已爾而雲章必以詩文並稱非篤論矣

蠶尾集十卷續集二卷後集二卷

山東巡撫採進本

國朝王士禎撰士禎以康熙甲子祭告南海阻雪東平望小洞庭中蠶尾山悅其清遠因取以名其山房併以名集
案盛符升作雍益集序稱合戊辰至乙亥詩文為蠶尾集十卷此集目錄下乃註詩自甲子年起其年冬及乙丑
年作別為南海集文自庚午年起士禎自序又稱偶次甲子使粵以前及丁卯以後詩文稍成卷帙因以蠶尾名
集士禎集皆所自刊而三說錯互如是未喻其故文中題跋凡三卷頗足考證然皆與居易錄重出又蠶尾集序
一篇既刊卷端又刻之集中亦乖體例其續集二卷皆乙亥迄甲申之詩惟無丙子一年詩以是年奉使祭告別
為雍益集也後集二卷則戊子歸田後所作五七言絕句居十之九自序謂時方剛定淇邁萬首絕句因效為之
然是年士禎七十五歲矣殆亦精力漸減不耐為長篇巨製也

南海集二卷

山東巡撫採進本

國朝王士禎撰皆其奉使祭告南海往還之作上卷自京師至廣州下卷自廣州至其家新城而止蓋其北歸志
亦止於新城也趙執信作談龍錄摭其開卷二詩以為似羈臣遷客之語其言誠是然士禎之詩長於山水別為
一調未可以二馮之法繩之也

雍益集一卷

山東巡撫採進本

國朝王士禎撰皆康熙丙子奉使祭告西岳西鎮江瀆途中所作前有其門人盛符升序述士禎自言再使秦蜀
往返萬里得詩纔百餘篇皆寥寥短章無復當年蜀道南海豪放之格其門人蔣仁錫後序亦述士禎自言老耽
禪寂遇事短吟略做西竺氏偈頌不應更作文字觀也可謂明於自知者矣

掄山集選一卷 山東巡撫
深進本

國朝王士禛撰士禛字禮吉山東新城人與其兄士祿弟士禎士祐自幼以詩相唱和三人皆成進士而士禛獨以歲貢終後後四年士禎選其遺詩三分之一刊之其詩綽有風調而才地較弱

純翁前後類纂一百十八卷 內府
藏本

國朝汪琬撰琬有堯峰文鈔已著錄始琬請告以前所作詩文自輯為類纂六十二卷先刊版置之堯峰皆山閣其歸田後十三年之作則輯為類纂三十卷又取明史列傳纂一百七十五首附以汪氏族譜及其父行略為別集二十六卷有周公贇者為校刻之後琬復自芟擇取其極意者為堯峰詩文鈔屬林佶繕本刊行世間多有其本而類彙原刻遂不顯矣

七頌堂集十四卷 安徽巡撫
採進本

國朝劉體仁撰體仁有識小錄已著錄是集凡詩八卷文四卷又空中語一卷尺牘一卷其曰七頌堂者體仁嘗慕成連陸賈司馬徽桓伊沈麟士王績羣應物之為人人為之頌故以名堂因以名集王士禎燕臺倡和集與體仁往來之作最多卷首施閻章序亦謂其詩清雋遙深然體仁欲力脫七子之窠臼而詩或生硬文或纖佻實出入於竟陵公安之閒明末山人之習未盡除也其空中語一卷皆所作豔詞故取黃庭堅謔名之其於集外別行則香奩集例也

閒居草一卷 江蘇周厚
培家藏本

國朝董合撰合字榕菴華亭人董俞弟也詩名不及其兄而詩格高雅過其兄是編卷首稱藝葵草堂彙而卷中稱閒居草蓋其全集之一種也大抵蒼涼幽咽有騷人哀怨之遺而愉悅其詞知其意有所寓而莫名其寓意之所在焉

雪鴻堂文集十八卷 山東巡撫
採進本

欽定四庫全書總目卷二百八十二

集部

別集類存目九

五

國朝李藩撰蕃字錫徵號懶菴通江人順治丁酉舉人官黃縣知縣是集爲其子鍾表所刊集中黃志略序謂黃有四累而屢辟宐復社甲宐均風尙宐更士習宐端稅課宐減蕃編徭役序極言派銀雜費之患他如憶堂記早魁辨黃志跋諸篇皆汲汲以興利弊爲事蓋有古良吏之風其文亦皆樸直不支意其人必惻悞無華故文亦如之歟然蕃之意固不在以詞藻見也

秋笈集八卷

江蘇巡撫採進本

國朝吳兆騫撰兆騫字漢槎吳江人順治丁酉舉人戊戌以科場黃緣事戍寧古塔後蒙恩赦還此集前四卷爲徐乾學所刊後四卷爲其子振所刊而編次無序通爲八卷前三卷題秋笈集四卷題西曹雜詩五卷題秋笈前集六卷題曰擬古後雜體詩七卷曰秋笈後集八卷則五頁以前題雜著六頁以後題後集蓋隨得隨刊故舛譌如是兆騫詩天分特高風骨遒上又荷戈邊塞窮愁之語易工故當時以才人目之而立身一敗萬事瓦裂其詩亦頗爲當代所輕特其自知罪重譴輕甘心宣讀但有悲苦之音而絕無怨懟君上之意猶爲可諒故仍存其目焉如兆騫者使其謹守防檢克保身名豈非國初一作手哉

改亭詩集六卷文集十六卷

江蘇巡撫採進本

國朝計東撰東字甫草吳江人順治丁酉舉人以江南奏銷案被黜又十餘年而歿東少負奇氣中年出遊四方遍覽山川之勝詩文日富康熙癸酉未榮巡撫蘇州爲刻其文集其詩集則刻於戊子王廷揚所助成也王暉今世說載其客鄴城日嘗訪謝榛之墓爲樹碣表之蓋以游食四方行蹤相近故用以寄意其生平事蹟具見尤侗所作計孝廉傳亦載卷首云

庸書二十卷

江西巡撫採進本

國朝張貞生撰貞生有玉山遺響已著錄是集爲其子世坤世坊所刊第一卷爲講義十條二卷至十五卷爲文十六卷至二十卷爲詩末附館試賦一首貞生家居構我師祠又捐宅爲誠意書院講學故所作多近語錄藻麗

非所尚也

安序堂文鈔二十卷 浙江巡撫採進本

國朝毛際可撰際可字會侯號鶴舫遂安人順治戊戌進士官彰德府推官際可與毛先舒毛奇齡有三毛之稱其學不及奇齡之博而亦不至如奇齡之強悍堅僻與先舒則厲行矣

會侯文鈔二十卷 浙江巡撫採進本

國朝毛際可撰此本刻於康熙己亥乃淳安方葵如所重輯

午亭集五十五卷 江蘇周厚培家藏本

國朝陳廷敬撰廷敬有午亭文編已著錄是集詩三十卷古樂府及古今體賦一卷經解十卷雜著十四卷益刻在文編之前猶未經刪定之本也

挹奎樓文集十二卷 江西巡撫採進本

國朝林雲銘撰雲銘有楚詞燈已著錄耿精忠之叛雲銘方家居抗不從賊被囚十八月會王師破闕始得釋

其志操有足多者然學問則頗為舛陋所評註選刻大抵用時藝之法不能得古文之源本故集中諸文亦皆不入格云

吳山敬音八卷 福建巡撫採進本

國朝林雲銘撰此其寓杭州時所作詩文故著以吳山其曰敬音則取莊子語也據自序云分為四卷而書實八卷或刻時每卷分而為二歟

經義齋集十八卷 翰林院孔目熊志契家藏本

國朝熊賜履撰賜履有學統已著錄此集乃康熙庚午賜履以禮部尚書丁憂家居時所刻凡文十四卷詩四卷其名經義齋者聖祖仁皇帝所賜御題也

深修堂集十六卷

兩江總督採進本

國朝熊賜履撰賜履既刻經義齋集又哀輻辛未起復及癸未致仕十三年中所作以成是編而書札獨多所題匾額對聯咸附載末卷深修堂亦 聖祖仁皇帝御題之名故以名續集焉

槐軒集十卷

山東巡撫採進本

國朝王曰高撰曰高字北山號槐軒在平人順治戊戌進士由庶吉士改給事中是集詩五卷文五卷曰高與新城王士禎兄弟相倡和耳掃目染詩格時復近之而才與學則未逮也

霞園詩集三卷文集一卷

福建巡撫採進本

國朝鄭重撰重字山公建安人順治戊戌進士官至刑部左侍郎是集詩三卷第一卷令靖江時作第二卷為越使吟祭告會稽南鎮時作第三卷為秦遊草典試陝西時作又雜文一卷考重典試陝西在康熙十七年戊午使越祭告在康熙二十三年甲子今反錄越使吟於秦遊草之前殆編次者誤歟

荆南墨農全集

無卷數 江蘇巡撫採進本

國朝徐階鳳撰階鳳字竹逸在興人順治戊戌進士官永昌府推官是編首曰演遊詩集官永昌時所作次曰願息齋詩文集里居後所作又附藝緣軒詞初集續集及秋泛詩餘兩遊詩餘四種而以荆南墨農集為總名荆南墨農階鳳晚年自號也

嵩菴集五卷

浙江巡撫採進本

國朝馮懋撰懋有溷考已著錄懋官雲南時先刻有南中集會吳三桂作亂懋不屈被囚遂燬於兵歸里後詩文亦多散佚此集乃其外孫洪承澤所刻凡古今體詩三百八十餘首蓋懋晚年掇拾殘藁以付其女故承澤得而刊之也

靜菴集十二卷

江西巡撫採進本

國朝鄭日奎撰日奎字次公貴谿人順治己亥進士改庶吉士散館授禮部主事康熙壬子與新城王士禛同典四川鄉試士禛詩所謂水部風流似鄭虔者也是集凡詩五卷又別集詩一卷文五卷中多留心時事之言又謄贖一卷一名醒世格言則剖記語也

日知堂文集六卷

直隸總督採進本

國朝鄭端撰端有政學錄已著錄是集凡奏疏二卷文告一卷記序書啟傳誌三卷其奏章公牘大抵曲暢事理而不以雕鑿字句爲工第三卷中狀式七頁乃呂坤實政錄中全文端爲江蘇巡撫時刊版以示所屬載其事於誌狀則可以前人之作刻於文集之中則非體何矣

世德堂集四卷

山東巡撫採進本

國朝王鉞撰鉞有粵遊日記已著錄是集文二卷詩二卷其文多通暢詳贍不爲詰屈贅牙詩學宋人而不流於纖靡一邱一壑亦自成結構在國初作者之中則未能金鼓抗行也

行素堂詩集一卷

直隸總督採進本

國朝李如芳撰如芳字仲淵高陽人其祖父明末皆死於亂如芳閉關冒死訪遺骸於兵火之中其行誼爲鄉黨所稱入國朝登順治己亥進士官鄆都縣知縣是集如芳所自編前有李蔚序蔚如芳諸父行也

思誠堂集二卷

山西巡撫採進本

國朝吳瑛撰瑛號銅川沁州人順治己亥進士官至大學士諡文端此集詩僅五十三首餘皆奏疏雜文並督撫楚中時牌示舊無刊本乾隆己丑其鄉人趙熟與始哀而刻之

古愚心言八卷

浙江巡撫採進本

國朝彭鵬撰鵬字奮斯莆田人順治庚子舉人康熙甲寅耿精忠叛逼脅受職凡九拒僞命卒得不污賊平後授三河縣知縣後官至廣東巡撫其平生以節氣著故集中多誓神之文其他奏疏案牘亦皆辭氣侃侃無所撓屈

欽定四庫全書總目卷一百八十二

集編

別集類存百九

官三河時與妻子書皆以清苦刻厲相勉足以見其爲人其他詩文則率臆而成字句皆不入格矣鵬行誼本末具載 國史至今婦女孺子人人能道其名固不必以文章傳也

聊園全集十五卷

山東巡撫採進本

國朝孔貞瑄撰貞瑄有大成樂律已著錄貞瑄少遊江淮既而官泰安濟南繼乃遠宰大姚所歷山水頗多炎荒萬里徭俗苗境多所記載故軼聞逸事多散見於此集中其文則奇逸之氣往往不可控羈而類唐澹削之處亦不一而足云

葉忠節遺藁十三卷

江蘇周厚靖家藏本

國朝葉映榴撰映榴字炳霞號蒼巖上海人順治辛丑進士官至湖廣布政司參議武昌撫標拔兵夏包子作亂映榴死之 特贈工部右侍郎 賜諡忠節初映榴嘗與李基和合刻詩集朱彝尊爲之序映榴死難以後其子尊等又哀其遺文與詩合爲此集重刻之凡文八卷詩賦四卷詩餘一卷彝尊又爲之序稱映榴之節不待此區區之文以傳其論當矣

張文貞外集二卷

江蘇馮樞採進本

國朝張玉書撰玉書有文集已著錄比其外集也凡序九篇跋一篇纂疏一篇祭文十七篇蓋當日刪棄之餘而後人掇拾存之者也

笠山詩選五卷

山東馮樞採進本

國朝孫懋撰懋有歷代循良錄已著錄是集爲汪懋麟所選定詩格清麗無塵俗之氣而邊幅較狹蓋才分弱也 王士禎序稱其五七言詩雖古作者無以加亦一時獎進之言耳

谷口山房詩集十卷

陝西馮樞採進本

國朝李念慈撰念慈字肥瞻號劬菴涇陽人順治戊戌進士授河開府推官後改補新城縣知縣以催科不力褫

職異三桂飯 大兵駐荆襄以奉檄運餉有功再授天門縣知縣康熙己未薦舉博學鴻詞試不入格而罷其詩

吐屬渾雅無秦人亢厲之氣是集皆其未第以前所作故歡愉之詞少而愁苦之音多其題曰谷口山房者史稱

池陽谷口在涇陽西北四十里為念慈舊廬所在故以名其集云

證山堂集八卷 兩江督總 採進本

國朝周斯盛撰斯盛字配公鄞縣人順治辛丑進士官即墨縣知縣嘗以事論繫出獄後奔走燕趙吳楚閉足迹

半天下與李澄中洪嘉植以談詩相契其斥當時劔南流派之非力主祝宋以宗唐然筆力藉弱亦僅得唐人之

形似而已

時一吟詩四卷 內府 藏本

國朝黎耿然撰耿然字介菴晉江人久困諸生乃棄而從軍積功至雲南總兵官詩皆率意而成殊不入格

柴村集十九卷附錄一卷 山東巡撫 採進本

國朝邱志廣撰志廣字粟海號洪區又號蝶菴諸城人柴村其世居也順治中由貢生官長清縣訓導是集文十

二卷蝶菴自藥一卷蓋其儀銘語錄之類詩集五卷賦一卷末附其孫性善所著德滋堂歌詩及志廣小傳其一

卷志廣少好神仙學於道士齊本守後乃從馬從龍講學故所見雜出儒墨之間其文長於議論然稱所欲言詞

多不擇詩尤涉擊壤集派其甥李澄中序謂雜以詼諧出以調笑亦覺風流蘊藉罔不宜人澄中山左勝流非無

鑒別殆以母黨尊行故婉詞見意歟

晚簾集七卷 福建巡撫 採進本

國朝陳箴撰箴字子寶龍溪人由貢生官連城縣教諭是集文三卷詩四卷前三卷分體後一卷則不分體蓋類

刻也其古文多雜偶句不古不今詩頗澤於古而不能得其格律蓋刻意有為而限於無師者也

中巖集十六卷 江西巡撫 採進本

國朝宋振麟撰振麟字子禎號中巖淳化人順治中拔貢生是集於振麟歿後僅存殘藁其女孫適王氏者得而藏之至乾隆辛未女孫之子文昭官於福建乃校刊之凡詩四卷文二卷末有富平李因篤所作傳略文昭序則稱郭明府九芝延居餘園書館崑山顧亭林二曲李中孚皆執弟子禮亭林顧炎武號二曲李容號也二人皆國初通儒似不輕北面於人者存其說可矣

積善屢詩逸無卷數 直隸 總督採進本

國朝劉逢源撰逢源字津逮廣平人與同里申涵光相唱和是編分初集二集後附前後漫興詩各五十首逢源生當明季崎嶇轉徙於江漢淮海之間故幽憂之語多而和平之韻鮮焉

鴻澤堂藁無卷數 安徽 巡撫採進本

國朝王良撰良有易賢已著錄是集前有顧祖禹序稱王子名燁蓋良本名燁作序時猶未更名也良與顧炎武等避故文章頗有法度而謹守古格未能變化其長短均在於是惟假師紀事內江紀事諸篇載明季流寇事頗為詳備足資參考云

稽雷山人集二十卷浙江 巡撫 採進本

國朝陳祚明撰祚明字允儀錢塘人浙江通志稱其博學善屬文以貧備書京師歿於客邸所著有詩二十卷詞一卷古文尤富其古文與詞今皆未見此編乃其詩集也亦名敝帚集自順治乙未至康熙癸丑凡十九年之作編年排次

止泉文集八卷戶部 尚書 王 採進本

國朝朱澤澐撰澤澐有朱子聖學考略已著錄此集乃其子光進所編凡詩一卷語錄一卷書牘四卷雜著二卷大抵亦皆講學之語蓋其生平惟以崇奉朱子為事也

性學吟二卷兩江 總督 採進本

國朝徐世沐撰世沐有易經借陰錄已著錄是編以詩講學皆拈理語爲題如太極仁義之類又時附來注數語如葛長庚道德寶章之式

陋軒詩四卷

江蘇巡撫採進本

國朝吳嘉紀撰嘉紀字野人泰州人泰州多以煮海爲業嘉紀獨食貧吟咏屏處東海自銘所居曰陋軒因以名集其詩頗爲王士禛所稱後刊板散佚此本乃其友人方千雲哀集重刻者也其詩風骨頗道運思亦復剴刻而生於明季遭逢荒亂不免多怨咽之音

欣然堂集十卷

江蘇巡撫採進本

國朝陶孚尹撰孚尹字誕仙江陰人官桐城縣訓導是集詩六卷詩餘附焉文四卷王士禛允何爲之序皆深相推挹實則無好無惡之作也

定峰樂府十卷

江蘇巡撫採進本

國朝沙張白撰張白原名一卿號定峰江陰人是集皆所作樂府或用古題或自製新題曹未爲之評點第五卷中有爲王熙作青箱堂頌爲魏裔介作倚竹頌禾跋其後曰或問青箱堂倚竹二頌何以俱入樂府予曰子不見郭茂倩全書乎宋泰始歌舞曲詞其中皇華頌聖祖頌天符頌明德頌帝圖頌皆頌也頌何可不入樂府哉不獨頌也自六朝至唐凡古七言律詩絕句排律無不入樂府者俱取其聲律格調非可執一論也云云案禾此說似乎博洽而實未詳考如從其始而論則頌居四詩之一是爲樂府之原本又何必牽引宋舞曲詞以相附會如核其派別而論則律逐調移詞隨律變郊祀燕享有殊於鼓吹平調清商有殊於吳聲以至舞曲琴操體例各殊郭茂倩書可以覆按如必混而一之總歸諸樂府則合而併之正可總謂之詩又何樂府之云乎至謂五七言律詩絕句排律無不入樂府者其說又知一而不知二禾所謂五七言律者非沈佺期古意姚崇享龍池樂章之類乎所謂排律者非薛道衡昔昔鹽楊巨源萬壽無疆詞之類乎漢魏至唐自朝廟樂章以外大抵採詩入樂者多倚

聲製詞者少其詩人擬作亦緣題取意者多按譜填腔者少故竹枝詞楊柳枝囉嘯曲之屬其倚聲製詞按譜填腔者也王維送元二使安西詩譜為陽關曲此採詩入樂者也蜀道難即賦蜀道巫山高即賦巫山此緣題取意者當其作詩與樂亦絕不相關甚有以古題行為七言律詩如胡曾之關山月者又甚至每句行為一首如趙嘏之昔昔鹽者其閒連篇大曲入破多用五言絕句而謂五言絕句為入破則不可遺隊多用七言絕句而謂七言絕句為遺隊則不可張白既不知詩樂之分禾又徒見樂府之用律詩遂執律詩以為樂府均失之矣

葭里集六卷葭里二集六卷葭里三集五卷

直續總督採進本

國朝周鑄撰鑄字若柯南和人順治中諸生屢試不售棄舉業專力為詩與廣平申涵光游故所作不失矩度然才地頗弱僅涉唐人之藩籬魏裔介序是集稱其詩溫潤清脫在唐人中項斯馬戴可以伯仲蓋舉其近似耳

突星閣詩鈔十五卷

檢討蕭芝家藏本

國朝王戩撰戩字孟毅漢陽人新城王士禎最稱其池陽山行長句以為突過歐陽修廬山高蓋士禎於歐詩不喜廬山高是以見有長句嘯奇者即謂能過之其實未能也是集前有士禎序云出前後詩屬子論序而戩自跋云排續續集合前集共十卷其姪柎跋云前五卷阮亭付梓後九卷朱愷仲董養齋所鐫末一卷則許謙次諸人所刻蓋此本合前後諸刻彙輯成編也

吳季野遺集一卷

浙江巡撫採進本

國朝吳垞撰垞字季野宣城人王士禎居易錄云吳垞文學戰國短長及管韓荀卿子作準言以擬權書其正學觀時效禍諸篇可自作一子今觀其文大抵摹擬周秦得其形似士禎所云猶明人標榜之餘習也

杏村詩集七卷

山東巡撫採進本

國朝謝重輝撰重輝字子勿號方山德州人大學士陞之子以蔭授中書舍人官至刑部郎中王士禎嘗選刻十

子詩重輝其一也

蕭亭詩選六卷

山東巡撫採進本

國朝張實居撰王士禛所評選也實居字賓公號蕭亭鄒平人士禛序稱其古今詩盈千首樂府古選尤有神解為擇其最者三百餘篇為此集云

後圃編年彙十六卷

浙江巡撫採進本

國朝李嶠瑞撰嶠瑞字蒼存盱眙人王士禛嘗稱其縱橫有奇氣今觀其詩士禛之說不謬而過求磊落轉近粗豪則陶冶之功未至也

荆樹居文略十卷

湖北巡撫採進本

國朝李懋緒撰懋緒字汝時號正所江陵人是編乃其門人楊士瓊所編凡語錄五卷詩文五卷懋緒與趙御眾漆士昌為友御眾孫奇逢弟子也故耳目濡染其語錄亦宗姚江之學然不為明季門戶之見以奇逢亦不立門戶故也至於文格樸拙詩多說理之作則講學家之舊派不自懋緒始矣

冠豸山堂文集三卷

福建巡撫採進本

國朝童能靈撰能靈有周易剩義已著錄是編刻本一卷為中天河洛五倫說鈔本二卷皆論學士之文然刻本題曰卷一必尚有他卷非完書也其論河圖之中數三五配大學之三綱領外八數配八條目一二三四為明明德之條目六七八九為新民之條目未免牽合至於辨六十四卦與大衍相合之數又以九卦即序卦之餘蘊序卦為氣九卦為朔亦苦心研索之學然大抵附會於術數朱子所謂易外別傳者也

谷水集二十二卷

浙江巡撫採進本

國朝胡夏容撰夏容字宣子海鹽人順治中諸生明兵部職方司郎中震亨子也是集凡詩二十卷文二卷康熙中其同邑陳光緯為之序竝傳又為之箋震亨家富藏書其撰唐晉統籤夏容實與有力泛濫古人耳目既闕故

負其才調頗以氣骨自高而羸稟之失亦由於此

丁野鶴詩鈔十卷

江西巡撫採進本

國朝丁耀亢撰耀亢字西生號野鶴諸城人順治中由貢生官至惠安縣知縣是集凡分五種曰椒邱集二卷起甲午終戊戌官谷城教諭時所作曰陸舫詩草五卷起戊子終癸巳皆其入都以後所作曰江干草一卷起己亥終庚子曰歸山草一卷起壬寅終丙午曰聽山亭草一卷起丁未止己酉自陸舫詩草以前耀亢所自刻江干草以下皆其子慎行所續刻也耀亢少負雋才中更變亂輾迴羈旅時多激楚之音自入都以後交遊漸廣聲氣日盛而性情之故亦日薄王士禎池北偶談載其陶令兒郎諸葛妻一律謂野鶴晚遊京師與王文安諸公倡和其詩亢屬無此風致蓋亦有所不滿矣

吾好遺棄一卷

江蘇巡撫採進本

國朝章靜宜撰靜宜字湘御吳縣人順治中諸生此本凡詩三百餘首列近體於前而次古體於後卷首具標姓字里貫如小傳式疑即從選本中析出者也靜宜嘗從學於宋實穎又與吳偉業酬贈故歌行清麗激楚頗近梅村集門徑特才華未為富贍故邊幅太狹終不能與之抗行耳

萊山堂集八卷遺棄五卷

浙江巡撫採進本

國朝章金收撰金收字雲李歸安人由監生官柏鄉縣知縣其時文統橫博麗雖不中規矩而勃勃有奇氣在當時其名甚噪日久論定究不免有偽體之議至今談制藝者舉為厲禁計其詩格亦當在盧仝李賀之間而是集所載了不異人其殆才有偏長歟

杲堂文鈔六卷詩鈔七卷

江蘇巡撫採進本

國朝李鄴嗣撰鄴嗣字杲堂鄆縣人順治中諸生其文鈔餘姚黃宗義所定詩鈔其同里徐鳳垣所定也鄴嗣自序稱得黃梨洲而後敢為文得梁中秋而後敢為詩宗義序稱其皆胸中流出無比擬皮毛之習蓋破除王李鍾譚之

窠臼而毅然自爲者也

孔天徵文集無卷數 江蘇巡撫採進本

國朝孔尚典撰尙典字天徵號汝林江西新城人順治中歲貢生新城縣志載尙典有文集數卷乃其師魏禧所評定今此本祇二冊詩文雜編又附以他人之詩殆編次未成之藁歟

懷葛堂文集十五卷江西巡撫採進本

國朝梁份撰份字質人南豐人嘗學於寧都魏禧得其文律是集前十四卷爲雜文末一卷爲詩十二首漫遊雜錄十一條

草亭文集一卷江西巡撫採進本

國朝彭任撰任字遜仕號中叔寧都人同邑魏禧嘗集同志九人講學于易堂任其一也是集前有行略一篇稱所著有草堂詩文集二卷此一卷其文集也大致與魏禧同派而質勝於文詞多於意未能與禧抗行其辨朱陸具同謂學者之病不在於辯之不紊而在於行之不篤持論頗平至尊信豐坊偽詩傳則失考矣

孔鍾英集十卷江西巡撫採進本

國朝孔毓瑛撰毓瑛字鍾英江西新城人嘗學於魏禮禮爲是集序稱其學古於世所不學之日其文頗有健氣而意言竝盡殆由蘊釀未深歟

孔惟敘集六卷江西巡撫採進本

國朝孔毓功撰毓功字惟敘江西新城人亦受學於魏禮是集皆所作雜文以年爲次不分體類目錄前有自記歉然自以爲未信而欲待他年之刪改亦可謂篤志斯事者雖骨格未堅其規撫固有自矣

江洽閣詩集十四卷浙江巡撫採進本

國朝冷士帽撰士帽字又湄丹徒人居傍大江其讀書之閣曰江洽故以名集其詩刻意學杜多爲激壯之音晚年

節饗餼之費自梓是集凡古今體詩十二卷首載琴操古樂府一卷末附詩餘一卷

江冷閣文集四卷續集二卷

浙江巡撫採進本

國朝冷士崑撰其文詞意條達頗為博辨而亦失之好盡朱子所謂少先輩淳實氣象者也其與張鍊菴論春王正月書及答或人一書均為平生得意之筆然其說似辨而不確所引秦以亥為歲首漢因之而史書始建國曰元年冬十月後世之文既不可以證經即所引伊訓元祀十有二月亦不知其為古文尚書蓋明知周正之必不可移而又必欲申夏時之說於是謂書春以敬天春為夏之春書王正月以尊王月為周之月仍胡安國之緒論而已矣

懷舫集三十六卷

直隸總督採進本

國朝魏荔形撰荔形有大易通解已著錄是集凡詩十二卷又續集詩九卷別集詩六卷偶逢草兩卷紀恩詩一卷外雜著三卷懷舫詞一卷雜曲一卷彈詞一卷末附自述一篇蓋仿揚雄之體然所云手註九古經望道窺一貫發微言明大義不落前儒窠臼云云自負亦頗不淺矣

秋水集十六卷

御史戈倫家藏本

國朝馮如京撰如京字紫乙代州人順治中由拔貢生歷官至廣東左布政使是集凡詩八卷文四卷宮詞一卷粵棧日記一卷北征紀略二卷其詩頗清利尤工於五言文亦平正惟駢體不為擅長詩文皆有批評為其宗人士標所點定粵棧日記者乃自江南之廣東任時紀其行役所見北征紀略則自廣入觀時作也

偶然云集十卷

江蘇巡撫採進本

國朝湯之錡撰之錡字世調宏興人是集冠以約言一卷江南通志稱其論學以周子主靜之說為宗仿高攀龍復七規春秋兩會即指是約也文錄二卷解易春秋獨多餘亦講學之文詩錄三卷仿擊壤集體語錄二卷大抵衍先儒緒論行錄行狀其一卷則其門人所輯也其隱公論謂隱公仇君懟父未免鍛鍊深文春王正月解謂始乎子者十二月之序始乎寅者四時之序惟商與秦建丑建亥時與月皆不可首亦未免勇於非古解大學以明明德為格

物又云物者可見可聞者也至善者不可見不可聞者也然既不可見聞矣又烏從而止之乎至於假寐見先師孔子拊其背而呼之未卒之先夢周公約其同行又吳與弼日錄之續矣

臯軒文編一卷

福建巡撫採進本

國朝李光坡撰光坡有周禮述註已著錄是集凡文二十篇皆發揮性理闡明經義之作其論學主程朱論禮主鄭氏論易則宗邵子而兼取揚雄太元以爲僭經雖有罪而存易則有功然必以太極先天二圖爲不出自陳搏則未免回護之見晁以道作李之才傳序述源流至爲明白同時之人當非無據非朱震一人之私言也

澄江集

無卷數浙江巡撫採進本

國朝陸次雲撰次雲有八絃釋史已著錄是集皆古今體詩蓋其官江陰時所作故以澄江爲名集中五古短篇及宮詞之類頗能自出新裁而蹊徑不免於太狹尤侗序稱次雲尙有玉山集附此以傳此本無之殆偶佚歟

北墅緒言五卷

浙江巡撫採進本

國朝陸次雲撰是集皆所作雜文而俳諧游戲之篇居其大半蓋尤侗西堂雜俎之流世俗所謂才子之文也

恕齋偶存七卷

浙江巡撫採進本

國朝方士穎撰士穎字伯陽淳安人順治末諸生是集凡詩六卷賦一卷末附其子棻如銜恤吟一篇士穎四子叔子棻如登康熙丙戌進士以制藝名棻如其季也士穎沒後棻如手寫遺藁刊行毛奇齡毛際可諸人爲之序其詩惟五言古體稍有氣格

欽定四庫全書總目卷一百八十二

集部

別集類存目九

七

欽定四庫全書總目卷一百八十三

集部三十六

別集類存目十

耐俗軒詩集三卷 直隸總督採進本

國朝申頌撰頌字敬立廣平人副榜貢生明太僕寺丞佳允之孫涵光之姪也涵光所著聽山集以杜甫為宗頌詩則惟作古體無近體古體又皆五言無七言大抵源出阮籍詠懷陳子昂張九齡感遇多託意寓言之作而其意思取徑又出入於黃庭堅蘇軾之間頗為拔俗然其間或有縱筆一往傷於快縱者或有故以波峭取姿掩抑示意傷於纖佻者或有太涉理語傷於實相者瑕瑜互見尙未能一一超詣也

一慨堂詩集一卷 江西巡撫採進本

國朝余光耿撰光耿字介遵婺源人康熙初諸生江南通志作康熙乙酉舉人案光耿之父懋衡為明萬曆壬辰進士距康熙乙酉凡一百一十四年斷不相及非順治乙酉之謬即別一人同姓名也懋衡與鄒元標馮從吾等講學同罹黨禍光耿承其父教淡泊自守故詩格亦樸實平近不尚藻采其拆貧字口號所云有分空安分營財本乏才者乃里巷字謎之詞尤不宐入集也

尋壑外言五卷 浙江巡撫採進本

國朝李繩遠撰繩遠有姓氏譜已著錄是集詩二卷文三卷其詩格意頗情文亦謹飭近人集中之有法度者然束於邇幅未能凌躡古人也

陽山詩集十卷 浙江巡撫採進本

國朝陳炳撰炳字虎文長洲人居陽山裘巷里因以自號是集分青桂巖藥澗州草風蓬吟楚遊草始吟寶華山臺蕉雨閒房寓中臺簷鈴集仙人塘上吟竺一鴈遺臺凡十集大致安帖而頗乏適警黃中堅作傳稱其少時有

松頂紅囊拖綠上山腰白鳥破青飛之句由是知名然二語實卑俗非詩家上乘不知當時何以傳誦也

黃葉村莊詩集十卷 浙江巡撫採進本

國朝吳之振撰之振字孟舉石門人以貢生授中書科中書常選宋詩鈔行世故其詩流派亦頗近宋人是編

凡初集八卷後集一卷續集一卷

白漫文集四卷 江西巡撫採進本

國朝沈受宏撰受宏字台臣太倉人所居地名洗白漫故以名集江南通志載受宏白漫集十卷而此本止四

卷核其目錄亦無闕佚殆後人汰削之本耶

璇璣碎錦二卷 安徽巡撫採進本

國朝萬樹撰樹字紅友宏興人是集皆迴文詩圖上卷三十幅下卷三十幅各以名物寓題組織頗巧然亦弊

精神於無用之地矣蘇若蘭事不可無一亦不必有二也

強恕堂詩集八卷 山東巡撫採進本

國朝高之騫撰之騫字仲治淄川人侍郎珩之子也詩學西崑香奩之體姿致有餘敖陶孫謂秦少游如時女

步春終傷婉弱於淮海集非確評移評此集則確矣張篤慶序謂詩無定法與年俱進將又有老健於是者亦

可謂婉而章也

芙蓉集十七卷 兩江總督採進本

國朝宗元鼎撰元鼎字定九號梅岑江都人嘗從王士禎學詩漁洋詩話稱其詩以風調勝酷似才調集又稱

其緣情綺靡不減西昆丁卯蓋其所取法者如此前有鄒祇謨序謂其憔悴江濱挂戶高吟年已四十猶在捉

鼻時則此集所編皆其少作也凡樂府一卷古體詩三卷律詩四卷排律二卷絕句二卷詞一卷賦一卷雜文

三卷元鼎弟之瑾為之箋註頗傷冗贅其以詩餘居賦雜文之前亦之瑾編次之失也

不礙雲山樓乘無卷數 江蘇周厚瑄家藏本

國朝周綸撰繪字鷹垂華亭人周茂源之子康熙初以貢生官國子監學正受業王士禎之門士禎作居易錄稱爲才士不偶者是也是編詩文以體分詞以小令中調長調分皆不題卷數亦無目錄及序跋似爲刊刻未竟之本

重知堂詩二卷兵部侍郎紀昀家藏本

國朝趙善慶撰善慶字怡齋德州人由貢生授國子監助教官至金華府知府嘗學詩於新城王士禎是集即士禎所點定前有士禎序稱其妙在本色頗爲得實惟序稱論次都爲一卷而此本實二卷又稱善慶將赴國學而下卷有歸田之作殆後復續刻而序則未追改歟

龍壽堂詩集三十卷浙江巡撫採進本

國朝張競光撰競光字覺菴杭州人其詩每首之後評語雜運殆於喧客奪主蓋猶明季詩社之餘習也

雪香詩存二卷浙江巡撫採進本

國朝丁嗣徵撰嗣徵字集虛嘉善人性嗜古喜藏書又頗耽心禪悅故其詩格在宋元之間亦時有清逸之致嘗自訂其集十卷與巨硯同篇箇中爲盜者誤持去購之不獲乃撥拾殘剩重訂此集故名曰詩存云

天外談四卷安徽巡撫採進本

國朝石龐撰龐字天外太湖人詩文皆纖仄佻巧墮入魔趣惟迴文雪賦一首春賦一首爲自古所無之格蓋小有才而未讀書聰明過於學問者也至遊春賦之每句用一部偏旁之字則彌無可取矣

復園文集六卷浙江巡撫採進本

國朝董閻京撰閻京字丹鳴烏程人康熙初官吉安府知府是集皆所作雜文自序謂明理以端其源博學以廣其識尊經以正其歸養氣以嚴其實和聲以發其華持論甚高然核其所作不能出公安竟陵門戶也

章江集五卷

內府藏本

國朝安世鼎撰世鼎字鑄九鑲紅旗漢軍由保德州知州官至江西巡撫此集乃世鼎自輯歷官奏疏以及文移條告諸篇編為是集後附以書記序二十一篇皆在江西時所作也

尺五堂詩刪六卷

浙江巡撫採進本

國朝嚴我斯撰我斯字存菴歸安人康熙甲辰進士第一官至禮部左侍郎其詩近體最富古體僅十之二三大抵長於華瞻之作湯惠休所謂如鑊金錯采亦雕績滿眼者也

讀書堂集四十六卷

江蘇巡撫採進本

國朝趙士麟撰士麟雲南河陽人康熙甲辰進士官至吏部侍郎是集為士麟所自編凡語錄四卷文十七卷詩二十一卷條約四卷大抵應酬之作冠以序一卷題詞一卷密行細字凡八十二頁哀然自為一巨冊亦向來刻

集者所未有也

珂雪詩

無卷數 山東巡撫採進本

國朝曹貞吉撰貞吉字升六號實菴安邱人康熙甲辰進士官至禮部員外郎初王士禛有十子詩略之刻貞吉與焉因其版分藏各家故往往各以別本單行後其曾孫益厚即士禛所錄附以朝天鴻爪黃山紀遊等集總題之曰珂雪詩貞吉詩格迥鍊其黃山諸作極為宋筆所推在京師時和其文姬歸漢圖等長歌極有筆力今檢集中不載又士禛感舊集所選登望海樓吳山晚眺金山諸詩亦皆不見集中則全彙之散失者多矣

九谷集六卷

兩江總督採進本

國朝方殿元撰殿元字蒙章九谷其別號也番禺人康熙甲辰進士歷官鄰城江寧二縣知縣是集凡樂府二卷諸體詩二卷雜文一卷末卷為環書上下篇附以四書講語數則其環書下篇多發明易義蓋亦雜家流也

戒菴詩存一卷

浙江巡撫採進本

國朝邵遠平撰遠平本名吳遠字戒三仁和人康熙甲辰進士官至光祿寺少卿己未召試博學宏詞授翰林院侍讀官至詹事府少詹事此集首行下署曰京邸集自序謂己未再入京五載內所作多典禮紀頌之章酷暑唐晉頗見宏瞻長洲韓葵序謂其使粵時唱酬甚富別爲集以行於世則此卷乃其全集之一種耳

雪園詩集六卷 編修鄭際唐家藏本

國朝梁珪撰珪字至鉉號雪圃廬建長樂人是集前有其友袁奐序作於康熙甲辰其詩凡分六集一曰靈峰草二曰江南遊草三曰循陔草四曰楚遊草五曰江西遊草六曰恒山遊草惟靈峰循陔二草爲居家奉母時所作餘皆其客遊南北登覽山川之什也

健松齋集二十四卷 續集十卷 浙江巡撫採進本

國朝方象瑛撰象瑛有封長白山記已著錄是集象瑛所自編凡文十六卷少作及入翰林以後之作悉在焉十七卷以下爲詩集秋琴閣詩一卷刻於康熙己未少作也展臺詩鈔二卷展臺燕昭王展禮賢士之臺即金臺而變其名也錦官集二卷康熙癸亥典試四川所作時蜀亂始平補行鄉試故以癸亥行也舊遊詩一卷未仕時遊鄉遊燕遊越遊楚作也萍雷草一卷國初浙閩未定時避兵杭州時作也都門懷古詩倦還篇共一卷都門懷古詩作於辛酉官翰林時倦還篇則乞假歸里時作也其編次不以作詩年月爲先後不解其意續集六卷刻於康熙壬辰凡文八卷詩二卷詩題曰所之草皆歸田以後作也

百尺梧桐閣集二十六卷 兩淮馬裕家藏本

國朝汪懋麟撰懋麟字季內號蛟門江都人康熙丁未進士授秘書院中書舍人官至刑部主事其詩法傳自王士禛而才氣縱橫視士禛又爲別格超執信談龍錄記嘗見其語溪中興頌詩起句云楊家姊妹顏妖狐即擲去不視謂頌中興而自天寶致亂敘起雖萬言不難辦也雖以懋麟爲新城弟子借懋麟以攻士禛未免操之已盛然亦足見其少所翦裁矣

學文堂集四十三卷 江蘇周厚培家藏本

國朝陳玉璫撰玉璫字廣明號椒峰武進人康熙丁未進士官中書舍人是集雜文三十一卷詩八卷詞四卷其說經之文及辨議諸作亦頗有源委不同期說然大致逶迤平行學宋格而未成詩則更非所長矣

別本學文堂集四十七卷 浙江巡撫採進本

國朝陳玉璫撰此本凡文四十三卷詩十卷詞三卷總五十六卷然文集之中有錄無書者九卷實為四十七卷與前一本大同小異然兩本皆無總目疑皆隨作隨刊之本非其全帙也王暉今世說稱玉璫每讀書至夜分兩眸欲合如幾輒用艾灼暫久之成痼蓋亦苦學之士又稱其所為詩文旬日之間動至盈尺見者選其俊才則貪多務博可知空其集不一本也

五經堂文集五卷語錄一卷 山西巡撫採進本

國朝范鄒鼎撰鄒鼎有理學備考已著錄是集皆各體雜文本名草草草卷首有鄒鼎自序文格酷摹尚書雖本之夏侯元昆弟語然未免太近遊戲未附語錄一卷乃其子翹搜輯諸刻書中鄒鼎評識之語彙成一帙因並梓之實非鄒鼎自作亦非門人所記也

柳村詩集十二卷 山東巡撫採進本

國朝董訥撰訥有督漕疏草已著錄其詩皆訥手自刪定因有別墅在平原城南二里名曰柳村遂以名集平原縣志稱康熙四十一年 聖祖南巡駐蹕柳村之南樓詢訥詩集其子思凝繕寫恭呈 御覽殆即此本歟

石屋詩鈔八卷補鈔一卷 浙江巡撫採進本

國朝魏應徵撰應徵字蒼石溧陽人康熙丁未進士官至邵武府知府此集即在邵武所刊第二卷為西湖和蘇詩第七卷為和自香山樂府其瓣香所在可以想見第五卷為擬漢樂府雖未至於苦學妃籍而形骸之外去之轉遠蓋唐樂府重在諷諭其文章可以力追漢樂府重在音律其節奏不可以臆揣也第三卷為閩行日記詩第四卷

爲閩中吟第六卷爲漁山詩皆以地記第一卷與第八卷則總題曰雜詩補鈔一卷亦無標目大抵詩材清拔而根柢不深如曉行詩暗燈移附壁句自是東裝眞景而刻畫瑣碎已入武功未派矣

繼鈞居文集八卷

江西巡撫採進本

國朝應是撰是有讀孝經已著錄是編皆所著雜文集中多載論策蓋康熙丁未改八比爲論策時所擬作其文多摹擬蘇氏父子辨論瀾翻而未免過求駿快遂割而不留其他序記傳誌諸篇則欲擬其鄉人王安石而遺幅亦微狹焉

慎修堂詩集八卷

福建巡撫採進本

國朝廖騰燿撰燿字占五號蓮山將樂人康熙己酉舉人官至戶部侍郎其服官頗著清節詩則尙未成家

匏菴遺集三卷

兩江總督採進本

國朝石璜撰璜字夏宗別號匏菴如皋人是集爲其子伊等所編據目錄當爲五卷而此本僅三卷蓋不全之本也

禮園集三十八卷

兩淮馬裕家藏本

國朝徐乾學撰乾學有讀禮通考已著錄乾學家富圖籍 聖祖仁皇帝購求遺書乾學奏進十二部其疏今在集中近所藏雖已散佚而傳是樓書目猶存於世所著讀禮通考及續宋元通鑑長編皆閩通淹貫確有可傳策中考辨議說之類亦多與傳註相關發蓋乾學爲顧炎武之甥而閩若瓊諸人亦多客其家 師友淵源具有所自故學問頗有根據然文章則時候未深大抵隨題行說不甚講求古格賦頌用韻尤多失考尙未能掉鞅詞壇與諸作者爭雄長也是集刻於康熙丁丑據宋學原序稱尙有外集今未之見或此本偶佚歟

白石山房彙十三卷

江西巡撫採進本

國朝李振裕撰振裕字維饒吉水人康熙庚戌進士官至兵部尙書是集凡詩三卷文九卷又附江南所作詩一

卷乃振裕督學江南時所刊前有施世綸汪琬序世綸序惟述政績不及文章琬序稱其工於臺閣之體亦頗著
微詞

別本白石山房彙二十六卷

浙江巡撫採進本

國朝李振裕撰此本詩文各十三卷與刻於江南者大同小異前後無序跋亦無目錄不知何時所刻也

已畦集二十一卷原詩四卷

江蘇巡撫採進本

國朝葉燮撰燮有江南星野辨已著錄是集前有自序論文章利病頗爲有見然檢閱集中諸作則頗不逮其所言至於意態波瀾彼此重複如聽松堂秀野堂二記其尤甚者也

趙恭毅剩藁八卷附藁芻蕘藁三卷

兩江總督採進本

國朝趙申喬撰申喬字松伍武進人康熙庚戌進士官至戶部尚書諡恭毅是編首奏議次序記次案牘之文終以雜著其孫侗敦所編也後附藁芻蕘藁三卷則申喬之子熊詔撰熊詔康熙己丑進士第一官至翰林院侍讀表芻其號也

玉巖詩集七卷

福建巡撫採進本

國朝林麟焟撰麟焟字石水莆田人康熙庚戌進士官至貴州提學煥事其詩法受自王士禛初官中書舍人時嘗借檢討江楫奉使琉球途中唱酬甚夥是編凡前集二卷皆初年所作又星槎草一卷中山竹枝詞五十首爲一卷皆出使時所作郊居集一卷則官提學後家居時作也自中山竹枝詞以前皆載士禛評點竹枝詞後又以當時同人贈別之作附焉

攷堂文集二卷

內府藏本

國朝張烈撰烈有讀易日鈔已著錄烈篤守朱子之說故集中多講學之文然如朱陸異同論王學質疑皆未免有鍛鍊周內之意不及其買董同異論之持平蓋漢學但有傳經之支派各守師說而已宋學既爭門戶則不得

不百計以求勝亦勢之不得不然者歟

臨野堂文集十卷

兩淮馬翰家藏本

國朝鈕琇撰琇有舩臘已著錄是集前有潘耒序盛推其四六之工今觀所撰疏傳頗勝近人而渾雅終不逮古人其外篇俳諧諸作如蔣陸侯傳之類則不可作也

立命堂二集十三卷

安徽巡撫採進本

國朝稽宗孟撰宗孟字淑子山陽人官至杭州府知府是集前有康熙壬子沈珩序稱已刻賦若干卷詩若干卷文若干卷故又編為二集計賦十二首詩四百三首文八十八首凡七卷其七卷以下附刻各種小集曰蠡史曰星路陽秋曰識小箋曰詩梅曰歐樂行舊錄各為一卷又詩餘一卷曰酒古董蓋其時去明未遠故通體皆規摹鍾譚以幽冷纖巧為宗觀諸集之名而其詩可見矣

古鉢集選一卷

山東巡撫採進本

國朝王士禛撰士禛字叔子一字子側號東亭又號古鉢山人山東新城人康熙庚戌進士未仕而卒是集為其弟子禎所編其詩長於情韻士禛序述計東之言曰三王並著詩名西樵阮亭早達故聲譽易起若東亭才詭旨作蜂腰哉然自是士禎篤念友子存此標榜之詞耳其實士禛不及士禎士禛不及士禛天下之公評也有懷堂詩文集二十八卷

內府藏本

國朝韓葵撰葵字元少號慕庵長洲人康熙癸丑進士第一官至禮部尚書乾隆三十年賜諡文懿是集為葵所自編凡詩六卷分躡躡歸愚病坊粟迷四集文二十二卷葵以制藝著名其古文亦法度嚴謹凡文章宅句皆刻意研削然其不能脫然於畦封亦即在此詩則又其餘事矣

蘋村類彙三十卷附錄二卷

編修徐天柱家藏本

國朝徐倬撰倬字方虎蘋村其號也德清人康熙癸丑進士官至翰林院侍讀聖祖南巡進所纂全唐詩錄首

欽定四庫全書總目卷一百八十三

集部

別集類存百十

五

禮部侍御是集凡修吉堂文集八卷應制集二卷寓園小草一卷燕臺小草一卷梧下雜鈔二卷蘋蓼閒集二卷
甲乙友鈔一卷汗漫集二卷野航集二卷鼓缶集三卷黃髮集二卷詞集二卷耄餘殘譜二卷附錄其子元正遺
藁二卷一曰清嘯樓草皆未第以前作一曰鸞坡存草則自入詞館以後應制紀恩遊譙贈荅之什也元正
字子貞號靜園康熙乙丑進士官至工部尚書徐氏五世翰林倬其第二世元正其第三世云

禮山園文集八卷

浙江巡撫採進本

國朝李來章撰來章有連陽八排風土記已著錄是集摹倣歐會頗為近似以作意點綴求姿故或失之微縟中
如李氏紫雲山莊記辛公子傳諸篇規撫古人亦覺墨痕未化謂之不失典則則可矣

殘本經史緒言一卷

兩江總督採進本

國朝朱董祥撰董祥有讀禮記略已著錄是編名似筆記實則文集前有雜論數篇其餘多言居家禮制而喪禮
尤多大抵執古義以繩今與所作讀禮記略相出入如居喪不當稱制之類一字之爭動輒累牘多非大義所關
也其書題曰上卷則尚有下卷而佚之目錄列文四十七篇而闕其原學上大司農本政書教子屢讀詩說三篇
蓋併此卷亦非完本矣

南酌文集十二卷

江蘇巡撫採進本

國朝彭定求撰定求有周忠介公遺事已著錄案定求之學出於湯斌斌之學出於孫奇逢奇逢之學出於鹿善
繼善繼之學則宗王守仁傳習錄故自奇逢以下皆根柢於姚江而能參酌朱陸之閒各擇其善不規規於門戶
之異同定求是集於文章之有關於學術者尤所留意而持論則兼採二家無所偏倚云

寶善堂詩彙四卷

直隸總督採進本

國朝張榕端撰榕端有海岱日記已著錄是集為榕端官內閣學士時所刊皆其康熙己未至己卯之詩前有任
邱龐壇序稱其詩和而不迫秀而不纖逸而不肆宛轉纏綿一寫其胸中之趣而未嘗借以宜其喜怒不平之

氣頗近其實然婉約有餘遜乏雄渾之氣深湛之思蓋其長在是其短亦在是矣

河上草二卷 直隸總督
採進本

國朝張榕端撰康熙庚辰榕端以內閣學士預治河之役至癸未始 召還此編皆其四年之中在工次所作

前有宋學序稱其泥塗樞樞礎石沈薪卒以塞決乃厥不見其有歌咏勤苦之勞而往往道其達天適性之樂
今觀其詩雖醞釀不深而和平恬靜筆言蓋不誣云

蘭樵歸田藁一卷 直隸總督
採進本

國朝張榕端撰皆康熙甲申以後致仕歸里之作其詩直抒胸臆多入香山一派蓋老境優游頽然自放不復
以文字為意矣

彭椒巖詩藁二十二卷 江蘇周厚
情家藏本

國朝彭開祐撰開祐字孝緒號椒巖妻縣人康熙丙辰進士官至武岡州知州是集分四種曰贈雲藁曰游琴
藁曰一螺藁各六卷曰藁丸藁四卷游琴一螺藁丸三藁皆其官河間及游大梁濟南時所著曉雲藁則其官武
岡時所著也

旭華堂文集十四卷補遺一卷 山西巡撫
採進本

國朝王奐曾撰奐曾字元亮別字思顯號誠軒山西太平人康熙丙辰進士官至湖廣道監察御史是編為其孫
增越勳典所刊凡奏議一卷雜文十三卷附以補遺一卷則奏議二首并序文雜著八首也

通志堂集十八卷附錄二卷 江西巡撫
採進本

國朝納喇性德撰性德有合訂刪補大易集義粹言已著錄性德生長華閩勤於學問鄉試出徐乾學之門遂受業
焉九經解即其所刻而徐乾學延顧澗校正之以書成於性德歿後版藏徐氏世遂稱徐氏九經解並通志堂
移之徐氏實相傳之誤也是編為乾學所哀斷凡詩五卷詞四卷文五卷淶水亭雜識四卷又附錄神誌哀輓之

作爲二卷

翠瀾樓詩集六卷

監察御史文
氏家藏本

國朝馮雲騶撰雲騶字懿生代州人康熙丙辰進士官翰林院編修是集皆所作古今體詩惟冠以賦一篇殿以

詞一闕蓋雲騶沒後其門人鹿祐所編故掇拾殘廢所存僅此云

兼山堂集八卷

浙江巡撫
採進本

國朝陳錫嘏撰錫嘏字介眉號怡庭鄞縣人康熙丙辰進士官翰林院編修是集爲慈谿鄧梁所選錄凡文六卷

詩二卷頗不失矩度然錫嘏本以制義擅長此則其餘力及之者也

清芬堂存彙八卷

浙江巡撫
採進本

國朝胡會恩撰會恩字孟綸德清人康熙丙辰進士官至刑部尚書其館閣諸詩別編爲廣慶集今未見傳本是

集所錄則由丙辰至庚寅三十五年所作也詩有清腴之致而風骨未遒故於一時流輩之中尙不能排突諸家

自成一隊

蓮廬草一卷

兩江總督
採進本

國朝黃鍾撰鍾字六詩號蓮廬如臯人康熙中諸生是集爲其門人鄧士英所編凡文四十四篇前列總目總目

之後仿史記自序漢書敘傳之例每篇各爲之序述所以立言之意自有別集以來茲爲創體然亦足以見其文

不苟作必有所取義矣其文大抵縱橫奇肆自達所見其與友人論文書大旨主於不似古人乃能爲古人亦迥

異貌擬秦漢詞雜齊梁之習惟其文多作於明末感觸時事往往言之過當如洪範論謂治世之天甚順乎人之

爲君子也則所嚮在此矣亂世之天甚怒乎人之爲君子也則所威在此矣至終篇歸於順受其正亦仍沿劉峻

稱命論之旨非和平中正之道其揚墨論雖爲僞談忠孝者發而以墨翟爲僞楊朱爲誠亦未免憤激太甚大抵

其才力足以馳驟古人而學養之深醇則未之逮也

西澗初集六卷 江蘇周厚
培家藏本

國朝劉然撰然字簡齋江寧人卷首有康熙戊午杜濬序稱其詩文闕深奧衍不可名狀今觀斯集殊不副斯言
其水中雁字七言律詩用上下平韻至三十首亦太誇多闕靡以如是題目作如是體裁雖李杜不能工也

青門簾櫳十六卷附邵氏家錄一卷青門旅纂六卷青門贖彙八卷 安徽巡撫
採進本

國朝邵長蘅撰長蘅一名衡字子湘武進人是集乃其兄子璿等編次康熙戊午以前為青門簾櫳詩六卷文十
卷己未訖辛未為旅纂詩二卷文四卷壬申後為贖彙詩三卷文五卷其邵氏家錄則以康節祠堂碑記之類彙
為一編者也

竹垞文類二十六卷 內府
藏本

國朝朱彝尊撰彝尊有經義考已著錄是集乃其未過時所刻中有曝書亭所未錄者皆悔其少作自為刪汰也
受祺堂詩集三十四卷 陝西巡撫
採進本

國朝李因篤撰因篤字子德又字天生富平人康熙己未 召試博學鴻詞授翰林院檢討顧炎武作音學五書
特載與因篤一札蓋頗重之聞若璩作潛邱劄記則云杜造故事莫過於李天生然所謂杜造故事者今不可考
則姑存其說矣是集為因篤所自定本三十五卷此本獨闕第四卷目錄註云未出其為因篤自刪之或為臆寫
隨刻誤排卷數不得已而立一虛卷均未可知也其詩大抵意氣蒼莽才力富贍而亢厲之氣一往無前失於粗
豪者蓋亦時時有之殆所謂利鈍互陳者歟

世恩堂集三十五卷 江蘇巡撫
採進本

國朝王頊齡撰頊齡號瑁湖華亭人康熙丙辰進士己未 召試博學鴻詞授編修官至大學士諡文恭是編凡
詩集三十卷經進集三卷詩餘二卷頊齡值 文治昌明之日奏太平禱獻之音故一時臺閣文章迥異乎郊寒
島瘦即早年未達時作亦無衰颯哀怨之意足以見其襟抱矣

深秀亭近草五卷

江蘇周厚
明家藏本

國朝潘鍾麟撰鍾麟字層峰華亭人是編皆七言律詩前四卷為乞酒之作所投贈者凡二百六十五人後一卷為寄懷之作所投贈者凡三十人以大學士王頊齡戶部尚書王鴻緒為冠蓋借此以存其人乞酒寄懷特假託之詞耳

遂初堂詩集十五卷文集二十卷別集四卷

江蘇巡撫
採進本

國朝潘耒撰耒有類音已著錄詩分少遊夢遊近遊江嶺遊海岱遊台蕩遊閩遊黃廬遊楚粵遊豫遊臥遊諸草分年編次文則各以體分惟為二氏作者人之別集用楊傑無為集例也未性好遊名山足跡甚廣其詩不事雕飾直抒所見古文騷徑較平稍遜於魏禧諸人而氣體渾厚空所依傍則又未所獨得也未家吳江之燭溪少受業於顧炎武頗得其傳故詩文皆有原本特其議論之文往往反覆求快太傷於盡未免失之好稱焉

抱經齋集二十卷附焚餘草一卷

浙江巡撫
採進本

國朝徐嘉炎撰嘉炎字華隱秀水人康熙己未召試博學鴻詞授翰林院檢討官至內閣學士兼禮部侍郎是集凡應制詩一卷樂府一卷古詩四卷律詩五卷絕句二卷玉臺詞一卷賦頌一卷論一卷序三卷雜文一卷末附焚餘草一卷乃嘉炎父肇森所作遭亂散失僅存二十餘首嘉炎記而錄之猶山谷集後附伐檀集意也

叢碧山房集五十七卷附詩義固說二卷

內府
藏本

國朝龐塏撰塏字齊公號雪崖任邱人康熙己未召試博學鴻詞授翰林院檢討降中書舍人終於建寧府知府是集凡文八卷雜著三卷翰苑彙十四卷舍人彙六卷工部彙十一卷戶部彙十卷建州彙五卷皆其所手自編定也塏為詩主於平正冲澹不求文飾當王士禛名極盛時能文之士率奔走門牆假借聲譽塏獨落落不相親附故士禛亦不甚稱之惟記其病足詩切防美人笑蹙者春來不過平原門一絕而已然塏早歲所作頗得深婉清微之致晚年菁華既竭流於枯淡其舍人彙不及翰苑工部彙不及舍人戶部彙不及工部至建州彙以後類唐益甚

田雯爲作戶部彙序以白居易陸游比之塏意頗愜然實箴規之言也未附詩義因說一卷論亦切實惟推行嚴羽之說以禪談詩轉至於支離曼衍是其好高之過矣

臥象山房集三卷附錄二卷

山東巡撫採進本

國朝李澄中撰澄中有滇南日記已著錄是編賦一卷文一卷詩一卷附滇南集一卷又良齋文選一卷安若訥爲作墓誌記其夢爲李攀龍後身趙執信亦稱其生而父夢攀龍入室故其詩仍學攀龍龐壇論文絕句則有壽光安子非知己強爲子麟認後身句今觀其集頗不類滄溟體格是塏所論者爲允若訥執信皆好奇之論也

白雲村集八卷

山東巡撫採進本

國朝李澄中撰康熙己未以召試入史館者澄中與龐壇交最契文格詩格二人往往互似是集卽壇官建寧府知府時爲刻於福建者壇序稱王新城阮亭田德州繪霞壇坵久成於時望重龍門漁村入都與鼎足而立士林稱山左三大家然澄中詩文修潔有餘至魄力雄厚終非王田比也王士禛感舊集載其齊謳行三首細草谷一首此集皆未載又魚龍圖一篇亦與感舊集所載數字不同蓋壇與士禛門徑稍別故去取亦稍異也

秋錦山房集二十二卷

江蘇巡撫採進本

國朝李良年撰良年字武曾秀水人康熙己未嘗薦舉博學鴻詞初冒姓虞氏名兆潢故當時薦贖無良年名朱彝尊所作墓誌僅載其原名而未載其冒姓亦偶疎也是編凡詩集十卷詞二卷文集十卷良年少有倚才其遊蹤幾遍天下所未至者秦蜀嶺嶠耳其詩清峭灑落亦頗得江山之助惟自少至老風調不變其蹊徑之狹殆才分所偏歟文則長於議論而短於敘述不逮其詩詞則已刻入六家詞中者殆三分之一品在其詩文之閒云

別本蓮洋集二十卷

刑部員外郎張道源家刻本

國朝吳雯撰雯蓮洋集已著錄案王士禛作雯墓誌稱其詩一剌於吳再剌於都下三剌於津門今皆未見趙執信懷舊詩序稱雯以遺案付王士禛雯歿後將二十年其集未出疑士禛耄而忘之又稱池北藏書散失殆盡是

集可知則雯之原槩似乎散佚近時乃疊出二本一爲臨汾對粗曾所刻一爲山東孫我所刻一卽此本爲浮山張體乾所刻劉本稱得自士禎門人黃叔琳家孫本及此本并稱得自雯姪乘厚家皆以士禎評點相誇孫本並考核評語之同異此本更較量圈點之真僞考第七卷中畱別車全詩載士禎評曰今車全果領解中州此亦識也惜天章不及見耳灼爲雯沒後之語則士禎所定或歸諸吳氏亦未可知也然士禎諸說部中所品題獎借者幾於指不勝屈今其集率久覆齮齕無人重其姓名而雯詩獨數刻而未已是知雯詩足以自傳不以士禎始重也刻雯集者反若借士禎以傳雯然則使雯不及識士禎卽謂雯詩不工乎三本之中劉本詳備於孫本此本又詳備於劉本要之詩之工拙不係篇帙之多少今繕孫本人祕閣而此本則存其目焉

雪石堂詩草

無卷數

陝西

國朝劉爾懌撰爾懌字敬文宦君人康熙己未嘗薦舉博學鴻詞其詩刻尋纂杜然大抵在形似之間

思復堂集十卷

浙江巡撫

國朝邵廷采撰廷采字念魯餘姚人康熙初諸生嘗從毛奇齡遊是集刊於康熙壬辰以龔翔麟所撰墓誌邵思

淵所撰墓表萬經所撰小傳冠諸編首

徐都講詩一卷

浙江巡撫

國朝徐昭華撰昭華字亦曰昭華駱加采之妻也其父咸清與毛奇齡善奇齡暮年里居昭華從之學詩稱女弟子故有都講之目是集卽奇齡所點定附刻西河集中者也

拙齋集五卷

浙江巡撫

國朝朱奇齡撰奇齡有春秋測微已著錄其平生潦倒場屋老而不遇刻意以古文自任所作皆簡潔明峭無鉤章棘句之態而邊幅不免於稍狹

張適可集四卷

浙江巡撫

國朝張遠撰遠有杜詩蒼梓已著錄是集凡分三種曰雲嶠集一卷蕉園集一卷梅莊集一卷梅莊集兼載詩文
蕉園雲嶠二集則有詩無文顧汧序謂其詩凡三變蕉園最先梅莊次之雲嶠則官緝雲時所作爲最後三集格
調皆與毛奇齡相近蓋二人同里得法於奇齡者多云

超然詩集八卷

福建巡撫
採進本

國朝張遠撰遠字超然侯官人康熙己卯舉人官祿豐縣知縣與蕭山張遠同姓名而其生稍後是集諸詩多近
元白長慶體在晉安詩派之中自爲別調杭世駿榕城詩話曰張遠領康熙己卯鄉薦第一游京師與竹垞初自
諸人倡和甚富有集梓行初嘗挾策游四方未有所遇登滕王閣題詩一達官嗟賞爲之延譽詩名遂振其詠松
澗有月明何處雨風定數聲鐘亦佳句也

山曉閣詩十二卷

浙江巡撫
採進本

國朝孫琮撰琮字執升嘉善人山曉閣其讀書處也集前有魏坤序謂其初集不下千首其後數十年復成兩集
今計此本所存僅十之二三耳其詩頗有警句而醞釀未深

香草居集七卷

浙江巡撫
採進本

國朝李符撰符本名符遠字分虎號耕客嘉興人是集後有其從孫菊房敬稱所作詩詞刻於滇南者曰香草居
詩刻於金陵者曰未邊詞未刻詩詞曰花南老屋集排偶之文曰補袍集後補袍集寄於容城胡具慶家遂亡其
本花南老屋集亦僅存詩一冊此集即菊房以香草花南二集合爲一編凡古今體五卷第六卷以下爲詞卽所
謂未邊詞也符早受知於曹溶得讀其藏書又與朱彝尊等結詩社故其學頗有淵源詩則詞意清婉似源出於
范成大與彝尊等格又異焉

秋水閣文鈔一卷

江蘇巡撫
採進本

國朝陳維岳撰維岳字緯雲宣興人檢討維岳之弟也晚年自定古文百篇詩二冊詞二冊其季弟欲附梓於維

崧迎陵集後未果遂多散佚此其傳寫殘本僅存賦十篇雜文十五篇卷首有同里蔣景祁序以維岳比其兄維崧然駢體略得維崧之格至魄力根柢皆遠遜之雜文中如十三經考特科舉策略無所發明漆園生傳亦毛穎傳之竅曰仲兄半雪傳亦失諱親之義考景祁序乃爲全集而作豈別有佳製佚不可親歟

寶蘭堂遺詩一卷

山東巡撫採進本

國朝趙執端撰執端號緩菴益都人雍正中分益都置博山趙氏所居割隸焉故此本追題爲博山人執端於趙執信爲從弟而於王士禛爲甥執信士禛以爭名構弊著書互詆兩家詬爭如水火執端獨舍執信而從士禛其詩句擬字摹亦頗得其一體集中有過士禛舊居詩曰突兀龍門羣仰望飄零宅相獨徘徊依然萬壑朝宗在不禁蚍蜉撼樹來蓋爲執信談龍錄發也執信談龍錄負氣指摘或不免失之太過而所言不盡無理執端直以羣兒謗傷詆之是其門戶之見尙未泯明季餘習矣

友柏堂遺詩選二卷

編修周永年家藏本

國朝馮協一撰協一字躬暨益都人大學士馮博第三子也以博蔭官至臺灣府知府是集乃協一歿後其子厚檢收遺彙求正於其姻家趙執信執信託目疾不省覽命門人常熟仲是保代刪之而執信爲之序是保跋焉其詩雖未極工亦非極惡而執信序嘲誦百端殊可怪訝亦可云魏收驚蚊蝶矣

野香亭集十三卷

浙江巡撫採進本

國朝李孚青撰孚青字丹壑合肥人大學士天馥子康熙己未進士官翰林院編修是集詩編年分卷起康熙戊寅訖己亥毛奇齡西河詩話中極稱其吐屬工敏盡其穎悟有過人者其氣骨未遑則年未四十而歿功候猶淺之故也

夢鼎堂文集四卷若溪集一卷

大理寺少卿劉天啟家藏本

國朝任觀瀛撰觀瀛字子登或書曰紫登以同音相假借也蕭縣人康熙己未進士官至陝西潼商道是集皆

其官長與知縣時所作若溪集以本名名其詩夢鼎堂在長興署中明歸有光所建觀瀛重構之因以名其文集云

晚樹樓詩彙四卷 江蘇周厚培家藏本

國朝吳震方撰震方有讀書正音已著錄是編乃其詩彙始於康熙己未初館選時終於甲申遊潯州時所作初震方以御史罷歸康熙癸未恭逢 聖祖仁皇帝南巡以所輯朱子論定文鈔進 呈蒙 恩復職且 御書白

居易詩以 賜因摘詩中晚樹二字以名其樓併以名集云

雙溪草堂詩集一卷附遊西山詩一卷 兩淮鹽政採進本

國朝王晉徵撰晉徵字涵齋休寧人康熙己未進士官至戶部侍郎是集為晉徵所自定以編年為次始於康熙癸丑終於戊子

老雲齋詩刪十卷 浙江巡撫採進本

國朝沈不負撰不負字集九一字次山平湖人是集據乾隆庚申陸奎勳序謂康熙己卯不負手刪其詩存十之五編年而不分體以授其子方蕙曰汝他日力能開雕當名之曰老雲齋詩刪不必更有增入云云而俞懋琪所作不負小傳乃稱不負病亟時客有傳濟南劉中丞幕中貫花主人降於亂 案貫花主人謂金人瑞也 不負慨然而興口吟云云竟絕筆於此今此詩刻於卷末則似非盡自定之本或以其事奇異故附存耶

馮舍人遺詩六卷 山東巡撫採進本

國朝馮廷樞撰廷樞字大木德州人康熙壬戌進士官中書舍人丁卯典試湖廣作詩一卷名曰晴川集王士禎嘗序之是集乃廷樞歿後趙執信所編首為京集三卷次即晴川集一卷又雪林集一卷曹村集一卷併為作序以士禎序為知之未盡蓋當日執信方以論詩與士禎相左故雖同一推獎亦持異議云

居業齋文集二十卷別集十卷 湖南巡撫採進本

國朝金德嘉撰德嘉字會公廣濟人康熙壬戌進士官翰林院檢討德嘉晚年鏡戶著書時同郡顧景星張仁熙劉醉驥往往追慕秦漢宗尚王李嘗歸有光為秀善婉媚德嘉獨不為高論力摹韓歐雖其間肆博贖遜於國初前輩而先民矩矱彷彿猶存惟復胡石莊書謂史館方開吾楚先輩故事尚待折衷江陵當國綜覈名實富國強兵數十年而論者以專病之熊揚慷慨任事而熊以過剛見嫉於當世楊專閭仗鉞憂憤以死或曰自縊當時夫穰逸賊別有主名武陵豈自經溝瀆者耶云云為徂於鄉曲之私未可為萬世之公論也

艾納山房集五卷

江蘇周厚培家藏本

國朝王九齡撰九齡字子武華亭人廣心之仲子也康熙壬戌進士官至監察御史其詩欲挹何李之流波而才思富豔加以纖穠如金陵雜感云十里青樓原上草六朝紅粉路旁花殆純以情韻勝矣

德星堂文集八卷續集一卷河工集一卷詩集五卷

浙江巡撫採進本

國朝許汝霖撰汝霖字時菴海寧人康熙壬戌進士官至禮部尚書是編文集自列十四卷而十一卷以下有錄無書註曰以下嗣出又目列卷九為課士條約卷十為河工集而書中九卷題曰續集河工集則自為一帙不入卷數且書有刊刻未完之處蓋初刻未校之本故體例不畫一也詩集五卷而分為八編曰祥獻集曰應制集曰水衡集曰使旋集曰河干集曰還朝集曰歸田集曰酬應集汝霖才思富贍集中諸體皆備然如河工集內批高陽水災詳文云仰速行確查候撫部堂批示繳之類僅十二字亦列之集中則授梓之時舉其平生手跡一字不遺未免不能割愛耳

素巖文集二十六卷

江蘇巡撫採進本

國朝王蒞生撰蒞生有謔言日錄已著錄是編所載皆雜文末卷並錄及訟牒則太甚矣

周廣菴全集三十八卷

浙江巡撫採進本

國朝周金然撰金然字廣菴上海人康熙壬戌進士官至司經局洗馬是編分為七種飲醇堂文集八卷抱膝庭

詩草二十卷 娛暉堂集一卷和陶靖節集三卷和李昌谷集一卷 西山紀遊詩一卷 南浦詞三卷 金然與施蘭章宋
玩遊其才思格力亦介於二人之間

奉使滇南集

無卷數 兩江總督採進本

國朝許嗣隆撰 嗣隆字山濤如 皇人康熙壬戌進士官翰林院編修是編乃康熙癸酉奉 命典試雲南往來

紀行之作多述山川名勝

嶺南二紀二卷

浙江巡撫採進本

國朝茅兆儒撰 兆儒號雪鴻 錢塘人是編皆其紀遊之詩 一曰嶺南方物紀 乃康熙壬戌居韶州時所作 凡二百四十種 各以絕句一首紀之 而略註其狀於題下 一曰粵行日記 則述其戊午歲自錢塘至廣州途中六十二日所經 凡一百四十餘首 亦每題爲一絕句

正說堂集十二卷

江西巡撫採進本

國朝張伯行撰 伯行有道統錄 已著錄是編前二卷爲奏議 第三卷至第五卷皆尋常案牘之文 第六卷爲書大抵講學之語 第七卷八卷爲序 皆已見所刊各書中 第九卷至十二卷爲記論說議傳墓誌墓表祭文雜著跡其一生大抵步趨陸隴其也

愛日堂詩二十七卷

浙江巡撫採進本

國朝陳元龍撰 元龍有格致鏡原 已著錄 愛日堂者 聖祖仁皇帝御書 故以名集 其詩編年分集 凡十二種

鶴侶齋集三卷

山東巡撫採進本

國朝孫勣撰 勣字子未 一字子未 號莪山 又號誠齋 德州人 康熙乙丑進士官至大理寺少卿 終於道政司參議 其集凡詩一卷 文二卷 勣性簡傲 不諧於俗 集中石丈詩云 山鬼矜伎倆 此老如不聞 或具袍笏拜 此老亦不尊 坦然自高 臥雨蝕青苔 痕蓋亦自寓云

次定四庫全書總目卷一百八十三

集部

別集類存目十

十二

寶宸堂集四卷

湖北巡撫採進本

國朝張希良撰希良有春秋大義已著錄是集凡文二卷詩二卷希良久困名場早年著述頗多亢厲之音自選入詞館後其體格乃一變焉

倚雲閣詩集一卷

山東巡撫採進本

國朝汪灝撰灝字文漪一字天泉臨清人康熙乙丑進士官至貴州巡撫是集爲王士禛所定凡評點悉仍士禛之舊自題蔣都憲家慶圖以下則士禛所未見故評點闕焉灝詩一以士禛爲法集中有讀唐賢三昧集二絕句殆於鑄金呼佛然姿韻略同而近體多淡泊語不及士禛之天然也同時別有汪灝字紫滄休寧人康熙癸未進士官翰林院編修二人詩文傳寫者往往相淆惟以字爲別識而已

吟老編年詩鈔十三卷

浙江巡撫採進本

國朝金張撰張字介山錢塘人其詩起康熙乙丑迄癸酉凡九年之作分年爲卷甲戌至丙子詩四卷題曰續鈔其外集五種曰己未詩刪曰玄鳳詩曰庚申詩刪曰學誠齋詩話曰雜著則皆有錄無書不知爲殘闕爲未刻也張詩力掃明人蹈襲之弊而開失之輕自稱學楊誠齋今檢所作其得失皆去之不遠所言可謂不誣矣

崑崙山房集三卷

山東巡撫採進本

國朝張篤慶撰篤慶有班范筋骸已著錄其詩古文頗知名於時此集乃有文而無詩疑編次未竟之本也篤慶才藻富有洋洋纒纒動輒千言風發泉涌不可節制如集中所載代王士禛作候補中書吳燦墓誌銘今錄入蠶尾續集者已刪削十之三四則亦頗病其冗漫矣其曰崑崙山房者以所居室旁有小山號崑崙因以名集云

高津草堂詩集

無卷數山東巡撫採進本

國朝田霖撰霖字子益號樂園又號香城居士德州人康熙丙寅拔貢生授堂邑縣教諭以病未赴縣與兄雲需竝能詩雲才調縱橫浴幾社之餘風以奇偉鉅麗自喜與王士禛同郡同時而隱然負氣不相下士禛池北偶談中

載其服藥必取異名一事亦除不滿之慮乃獨從士禎遊是編凡禹津草堂五字古體詩一卷五字今體詩一卷皆士禎評而序之序稱唐有詩不必建安貞初也元和以後有詩不必神龍開元也北宋有詩不必李杜高岑也語蓋爲變而發又禹津草堂絕句詩一卷里人孫勳序之序稱吾州近時前輩以詩名者無聞於時余性不近詩然當披編佩句之餘亦或頗有所觀於作者之旨大都若格格於余懷未能強以爲無聞然也語亦侵襲然觀厥所作雖密咏恬吟成一邱一壑之趣至才力富健究不足以敵變也集後又有勳隱集一卷南遊集一卷總題曰禹津草堂七十以後詩黃越序之稱其垂老所作彌淡彌甘大抵露生平爲詩以七言絕句自負自少至老亦惟是體特多云

匡山集六卷 山東巡撫 探進本

國朝王沛恂撰沛恂字書巖諸城人官兵部主事是集凡文五卷詩一卷詩文皆伉直有氣而亦有特氣之處故意之所至暢所欲言不免時有累句

荷樹閣集一卷 山東巡撫 探進本

國朝安箕撰箕字青士壽光人致遠之次子是集止詩二十八首賦九首記一篇附載致遠集末箕名父之子承其家學故詩文皆有矩度惟波瀾尙未老成則問世太早之故也

簞簞遺集一卷 內府 藏本

國朝汪筠撰筠字禹吹編修琬之長子少補吳江學諸生年三十二病咯血卒琬得其遺詩數十篇爲刊附於汪氏家傳集後

學古堂詩集六卷 浙江巡撫 探進本

國朝沈季友撰季友字客子平湖人康熙丁卯副榜貢生其集卷一至卷三曰南旋集卷四至卷六曰秋蓬集乃其孫鎔所合刊季友爲陸棠之婿與汪琬毛奇齡以詩相倡和奇齡爲作集序亦以才子目之然抑揚皆在是兩字矣

半卷詩彙無卷數 山東

國朝勞嫻振燭字貞著陽信人山左詩鈔作勞嫻其字從石然此本為其家刻字皆從山則山左詩鈔誤也燭年五

十四為詩故工候未深多不入律高意曠代之才固不容於有二矣

東湖文集三卷江蘇周厚培家藏本

國朝朱璘振璘所編諸葛丞相集已著錄是集前二卷為雜文第三卷即所作通盤頓略之論斷然止於唐末似非

完本也

藥亭詩集二卷江蘇周厚培家藏本

國朝梁佩蘭撰佩蘭字藥亭番禺人康熙戊辰進士改庶吉士是編乃休寧汪觀所選皆近體詩卷首有朱文小印

曰古體嗣出則不但非其全集即選本亦尙未刻竣矣

鉢山堂詩集十九卷浙江巡撫採進本

國朝陳阿平撰阿平字獻吉東莞人康熙中諸生與梁佩蘭同時是集即佩蘭為之序其古體勁直而少醜醜五言

律詩如東風歸故國孤燭對高樓明月又將滿秋風吹別離諸聯頗有風味惜不多得耳

紺寒亭詩集十卷江西巡撫採進本

國朝趙俞撰俞號蒙泉嘉定人康熙戊辰進士官定陶縣知縣是集俞所自編詩格極為道上但才鋒太銳少一

唱三嘆之致文則縱筆而成傷於平易又不及其詩

林左堂詩集六卷江西巡撫採進本

國朝孫致彌撰致彌字愷似嘉定人康熙中被薦以太學生賜二品服出使朝鮮採詩戊辰成進士改庶吉士嘗

至翰林院侍讀學士歿後詩彙散佚雍正中張鵬翰朱厚章得鈔本於戴璣家始選而刻之詞凡三種曰別花餘

事曰梅泚曰稱琴皆其門人樓儼所定刻集附詞後則未詳何人編次也致彌以書名得董其昌之法詩則以跌宕

流邁爲長而率易亦所不免

峇壠山人集

無卷數 山東巡撫探進本

國朝謝乃實撰乃實字華面福山人福山有峇壠山因號峇壠山人康熙戊辰進士官興寧縣知縣是集不分卷數但以各體類從而附詩餘於末其詞名絕句一百三十首別爲一冊爲古今所未有然雜體防自齊梁究爲小品可偶一爲之不可以爲擅長之技也

過江集四卷

兩淮馬裕家藏本

國朝史申義撰申義字叔時號蕉飲江都人康熙戊辰進士官選庶吉士散館改給事中時新城王士禎方以詩名海內嘗稱申義及湯右曾足傳其衣鉢見集中自註 聖祖仁皇帝嘗以後進詩人詢澤州陳廷敬廷敬以申義及周起渭對見廷敬序中其官翰林時有蕪城集典試雲南時有使滇集此則官給事中時前後數年作也

寒村集三十六卷

江蘇周厚培家藏本

國朝鄭梁撰梁字禹梅慈谿人康熙戊辰進士官至高州府知府是編詩分十一集一日見黃囊詩賦五卷二日五丁詩彙五卷三日安庸集一卷四日玉堂集一卷五日歸省偶錄一卷六日還朝詩存二卷七日玉堂後集一卷八日寶善堂集一卷九日白雲軒集一卷十日南行雜錄一卷十一日高州詩集二卷文分四集一日見黃囊二卷二日五丁集一卷三日安庸集一卷四日寒村雜錄一卷補一卷又半生亭集一卷息尚編四卷則詩文合刻也梁受學於黃宗羲嘗謂陳師道年三十一見黃魯直盡焚其藁而學焉梁見宗羲時亦三十一故詩文皆以見黃囊爲冠其文得之宗羲者爲多而根柢較宗羲少薄詩則秀門別徑殆所謂有韻之語錄其書定山詩鈔句云明朝詩學崔公甫若語仙才拜定山可以得其宗旨之所在矣

雙雲堂文集六卷

浙江巡撫採進本

國朝范光陽撰光陽字國雯號北山鄞縣人康熙戊辰進士官至福建延平府知府是集爲其晚年所手

欽定四庫全書總目卷一百八十三

樂部

列集類目十

定沒後其孫從律等以充安堂近彙附入刊行其曰雙雲堂者以其先墓有紅雲白雲一山故名所居以示不忘其
祖之義云

黎乘初集一卷二集一卷

山東巡撫採進本

國朝劉以貴撰以貴字滄風濰縣人康熙戊辰進士是編初集先詩後文二集先文後詩每篇之後俱附王道炷評語道炷序稱其語意獨造刻鑿精深蓋生澀爲工者後附初學正鵠數十則則皆鄉塾講師語也

嶠山文集四卷詩集一卷

山西巡撫採進本

國朝田從典撰從典字克正陽城人康熙戊辰進士官至文華殿大學士諡文端是集奏疏序傳等雜文五十餘篇爲四卷詩三十餘首爲一卷又附以補刻文一冊據卷首儲大文序謂從典文多散佚此乃其子暨族屬所搜輯者故僅止於此非全本也

潘中丞集四卷

江蘇巡撫採進本

國朝潘宗洛撰宗洛字書原號巢雲又號根谷宜興人康熙戊辰進士官至湖南巡撫詩文多臺閣之作奏疏序記家訓等篇明白質直視其文頗爲勝之卷末有儲大文所作傳以爲古文詞上宗史記詩由玉溪詣少陵皆以千古第一人推之則非其實也

橫亭詩鈔五卷附詞鈔一卷

江蘇巡撫採進本

國朝曹寅撰寅有居常飲饌錄已著錄其詩一刻於揚州計盈千首再刻於儀徵則寅自汰其舊刻而吳尚中開雕於東園者此本卽儀徵刻也其詩出入於白居易蘇軾之間

時用集

無卷數浙江巡撫採進本

國朝陳訥撰訥有句股引蒙已著錄訥爲黃宗羲門人又與查慎行同里友善故文格詩格俱有所受然所作終亞於二人是集爲訥所自編凡四十歲以前所作悉刪去之斷自己已迄戊子爲正編又自己丑迄壬子爲續編

則其晚所增刻也其日時用集者許自序爲家塾書聯用東坡語春秋古史乃家法詩筆離騷亦時用故手訂正續集遂以時用標題云

善書堂四十六卷

浙江巡撫採進本

國朝陸繁弨撰吳自高註繁弨字振

塘人自高字若山桐城人官翰林院待詔是集皆駢體之文崑山徐

炯爲刻板陳廷會序之而章藻功爲之跋藻功繁弨之門人卽作思綺堂四六者也本止四卷雍正甲寅自高

爲之註始分十卷王暉今世說載繁弨自許儷語爲海內少雙蓋是時陳維崧吳綺皆已下世矣

欽定四庫全書總目卷一百八十三

欽定四庫全書總目卷一百八十四

集部三十七

別集類存目十一

湖海集十三卷 山東巡撫採進本

國朝孔尚任撰尚任有節序同風錄已著錄尚任官國子監博士時隨侍郎孫在豐在淮揚疏濬海口因輻其入淮

以後詩文自編此集故以湖海為名

幸跌草三卷 浙江巡撫採進本

國朝黃百家撰百家有體獨私鈔已著錄是集凡雜文二十篇其序盧氏春秋三傳纂凡謂春秋之本旨皆顯以示

人無暗藏機括使人如猜謎射覆者深得聖人作春秋之意其王劉異同序亦深見兩家之闢奧大致頗肖其父但

蒼老不及耳書首題曰學箕五彙則卷帙尚多此其彙中之一種耳

眺秋樓詩八卷 浙江巡撫採進本

國朝高岑撰岑字峴亭商邱人官豐城縣知縣其詩每卷各為集名終之以和月泉吟社田園雜興六十首岑為吏

部尚書宋犖外孫故其詩法亦本於犖與宋至緯蕭草堂集體格相近所謂酷似其舅者也

赤嵌集四卷 兩淮馬裕家藏本

國朝孫元衡撰元衡字湘南桐城人康熙中官至東昌府知府是集皆其為臺灣同知時所作以地有赤嵌城故以

為名多紀海外土風物產頗逞才氣而未能盡軌於詩律王士禛為之點定謂其追蹤建安躡跡長公似乎太過也

四香樓集四卷 江蘇巡撫採進本

國朝范繼撰繼字武公婁縣人其詩源出晚唐而參以南宋如蜂憎綠蟻晴喻蜜燕覓青蟲畫哺雛一潭水聚三更

月四野山圍小閣燈三秋樹老蟬聲盡八月江寒雁影遲蟬聲送過秋多少鶴夢憑他夜短長之類皆粹有思致而

格調未高陳元龍序稱其長堪輿學蓋嘗館於元龍家相傳格致鏡原即其所纂亦博洽之士也

釀川集十三卷

浙江巡撫採進本

國朝許尚質撰尚質字又文山陰人是集賦一卷雜文二卷詩二卷詞五卷宋祖煙序謂尚質少而業詩亦喜飲指邑

中所謂沈釀川者自號因以名集其文頗有法度詞亦修整惟歌詩稍嫌放縱或不入律云

南園詩鈔十卷

江蘇巡撫採進本

國朝尤世求撰世求字念修長洲人官南充縣知縣是集分全臺草一卷水壺草二卷湛蕙草一卷懷新草二卷

沁雪草二卷逢辰草一卷都歷草一卷世求為侗之孫故詩格亦與西堂雜俎相近

舟車初集二十卷

浙江巡撫採進本

國朝陶季撰季原名淑字季深後以一字為字又以字行寶應人王士禎漁洋詩話記其與萊陽董樵同以一字

為字因而賦詩定交者是也其平生足跡半天下詩多於舟車得之因名舟車集其詩多才鋒肆厲風發泉湧不

為遺幅所窘然有警句亦有率句亦有健句亦有弱句蓋跌宕有餘而陶鍊未至者也

燕堂詩鈔八卷

戶部尚書王際華家藏本

國朝朱徑撰徑字恭亭寶應人裔黎之壻也是集為徑所自編自康熙丙寅至己卯凡十四年之詩緣情綺靡頗

有格韻特少作居多尚未能盡謝鉛華耳

鈍齋文鈔七卷

江西巡撫採進本

國朝楊兆瞻撰兆瞻字又平瑞金人是集前有自序謂著文三百餘首法其三之二授諸梓則兆瞻所自定也又

有張尚瑗序稱其文似歸有光使汰其冗句俗字固亦近之矣

集古梅花詩

無卷數浙江巡撫採進本

國朝張吳曼撰吳曼字也倩上海人居吳淞江上其地多梅因為集句賦咏凡和中峯禪師韻者一百首和陳涉

江韻者三十首自和者十首又一百首則吳曼以同里高士沈球本有是體爲繼作而合刻之者又一百首則吳曼六十生日其仲兄文卿取十月先開嶺上梅句集古爲壽吳曼因續爲之者末附集唐梅歌一首乃七十六歲所作殆終身詠此一花也

根味齋詩集二十卷

編修徐天祥家藏本

國朝徐志莘撰志莘字任可一字喬農德清人工部尚書元正子以父蔭官順天府通判是編凡趨庭集二卷壯圖集三卷小草集三卷棄權集七卷起乾集二卷老傳集三卷詩多取法蘇陸不事雕飾蓋其家學然也

笏時樓集五卷

江蘇周厚培家藏本

國朝張祖年撰祖年有道驛集已著錄是書釋疑孟一卷以司馬光有疑孟一書而祖年逐條爲之辨廢言四卷則其所自著也中多游戲之詞與道驛集之正色講學者又殊

觀樹堂詩集十四卷

浙江巡撫探進本

國朝朱樟撰樟字鹿田錢塘人由舉人官至澤州府知府其詩爲叱馭集一卷入蜀時作也問絹集一卷白舫集二卷古廳集四卷皆令江油時作也冬秀亭集四卷官澤州時作也刻曲集一卷則天台紀遊詩也一半勾留集一卷則憂歸居杭詩也

恕谷後集十卷續刻三卷

直隸總督探進本

國朝李堪撰堪有周易傳註已著錄是集所作古文也前有其門人閻鎬序稱恕谷者自名其里也後集者自康熙卒未以前俱置之而惟存其後焉者也集首第一篇爲送黃宗夏序後有題曰此王崑繩改本也恕谷初學八大家崑繩言當宗秦漢章法訂此恕谷後謂唐宋不如秦漢秦漢不如六經於文法一宗聖經題曰後集云云崑繩者大興王源字也嘗撰文章練要分六宗百家談古文之法後與堪同師顏元疇遂從學古文盡棄其少作後集之名蓋別其前之所棄也今觀其文根柢仍出八家但開合斷續不主故常異乎明以來學歐曾者惟以紆餘

曼行為長汀遠曰秦漢曰六經溢其量矣嗒天分本高其學自成一以經世致用為主亦具有根柢然負氣求勝其文或失之纒豪少古人淳穆之氣其持論又自命太高自信太果幾於唐宋元明諸儒無一人能當其意亦未免仍於偏激蓋前明自萬歷以後心學盛行儒禪淆雜其曲謹者又關於事情洽及國初猶存商俗故顏元及礫獨力以務實相爭存其說以補諸儒之枵腹高談未為無益然不可獨以立訓盡廢諸家譬諸礫石大黃當其對證實有解結滯滯之功若專服久服則又生他疾耳

東山草堂文集二十卷詩集八卷續集一卷

戶部尚書王際華家藏本

國朝邱嘉穗撰嘉穗有考定石經大學經傳解已著錄其文頗條暢詩則淺弱集後舊附詩箋註五卷通言六卷又考定石經大學經傳解一卷今各分著於錄傳從其類

在陸草堂集六卷

兩淮馬裕家藏本

國朝儲欣撰欣有春秋指掌已著錄欣以制藝名於時而古文亦謹潔明暢有唐宋家法大致於蘇軾為近所作蜀山東坡書院記宗旨可概見也其中如周公太公論捷伯禽辨挾天子辨皆少近迂與齡辨則先儒久言之亦不免為屋下之屋其正統辨不取帝蜀之說亦不免失之好辨也

息廬詩一卷

江蘇周厚靖家藏本

國朝陶爾穉撰爾穉字穎儒華亭人是集前有曹洛序稱其人巧極天工錯顏光敏序稱其七古似青蓮長吉近體不專一家而各盡其妙今觀所作大抵以才思擅長品格故未能超詣雪美人七律二首世所豔稱實則小巧也

陳恪勤集三十九卷

浙江巡撫採進本

國朝陳鵬年撰鵬年字北溟號滄洲湘潭人康熙辛未進士官至兵部侍郎河道總督諡恪勤是集凡分十編曰耦耕集者以舍北耦耕堂而名也水東集者以其先人隴墓所在也蒿廬集者憂居前後所作也浮石集胸山集淮海集者皆官游地也于山集香山集武夷集者皆往來游息處也未附喝月詞五卷則詩餘也

道榮堂文集六卷

兩江總督採進本

國朝陳鵬年撰此本為鵬年所自編刻於格勤集之前其生平以清操受主知詩文非所注意集中亦皆應酬

之作更不見所長

固哉叟詩鈔八卷

浙江巡撫採進本

國朝高孝本撰孝本字大立號青華嘉興人康熙辛未進士官績溪縣知縣孝本雖年屆四十始為詩然罷官後

放浪山水以老故其詩灑落有清氣但深厚不足耳是編分十七集曰趨庭集曰江漢集曰徑山集曰琴溪集曰

嶺南集曰秦遊集曰大鄣集曰葛園集曰晉遊集曰津門集曰南州集曰幔亭集曰海岱集曰黃梅集曰台雁集

皆孝本七十八歲所自編為雍正丙午以前詩至丁未又編其病中所作為維摩集附十七集後故自序但列十

七集云

葛莊詩鈔十三卷

內府藏本

國朝劉廷璣撰廷璣有在園雜志已著錄其詩以陸游為宗在園雜志嘗自記其童去自埋生後火飯來還掩讀

殘書一聯或以為勸讓陸游呼童不至自生火待飯未來還讀書句自稱其用意不同是固誠然然奪胎換骨要

不能謂不出於游也又自記有人評其詩曰此亦出入於香山劔南之間而未純者自以為允可謂自知矣

葛莊編年詩

無卷數江西巡撫採進本

國朝劉廷璣撰葛莊詩鈔止於官九江道時是編又其官淮徐道時所作分年排次起康熙丁巳止於壬辰後復有

補遺一卷

咸齋文鈔七卷

浙江巡撫採進本

國朝查旭撰旭字咸齋海寧人康熙癸酉副榜貢生是集凡書一卷序二卷祭文一卷論一卷傳一卷雜著一卷旭

有孝行嘗於兵亂中崎嶇萬里尋父遺板士論稱之其文源出南宋頗清雅有法度使假之年尚可追古作者前

欽定四庫全書總目卷一百八十四

雜部

別集類存目上

三

有益都趙執信序作於旭在之日又有楊中訥序則旭沒後所作也

冰齋文集四卷

浙江巡撫採進本

國朝懷應聘與應聘字莘皋秀水人是編刊於康熙癸酉蓋所自編皆散體古文而時文選本之序最參

清端集八卷

江西巡撫採進本

國朝陳瓊撰瓊字文煥一字眉川海康人康熙甲戌進士官至福建巡撫清端是集凡文七卷詩一卷皆非常

行然瓊居官以廉介稱其節概足以自傳亦不必以文章傳也

夢月巖詩集二十卷

浙江巡撫採進本

國朝呂履恒撰履恒字元素號坦菴河南新安人康熙甲戌進士官至戶部侍郎此集乃雍正乙巳其姪纘會等

校刊詩以體分末附詩餘二十四首前有凡例稱其詩或經歲一改或一月數改如洛陽秋思河上寓目詩之類

聯嫌其調近七子輒加竄易金陵雜感之結句嫌其涉於怒罵亦復易之又稱盛朝詩選載其秦中懷古詩洛

陽秋思詩懷公毅詩字句皆有所竄亂今悉從原本云云或刊版時有所點定歟

冶古堂文集五卷

浙江巡撫採進本

國朝呂履恒撰是集為履恒歿後淳安方葵及其門人石屏張漢所選定凡一百九十二篇每篇各有評語如

制義之式

雪鴻堂文集四卷

山東巡撫採進本

國朝李鍾璧撰鍾璧號鹿嵐通江人檢討蕃之子也康熙丙子舉人官平南縣知縣考古來集部之名往往相復

然無一家之中共一集名者惟呂本中呂祖謙俱稱東萊集然祖謙集加太史字以別之見文獻通考又洪巖虎及其

子希文皆名軒渠集然希文集加續字以別之非竟相同鍾璧之父蕃有雪鴻堂集已著錄而鍾璧此集仍以雪

鴻堂為名父子竟無所別亦未有之粉例也其詩皆信筆揮灑於聲律多未能諧疊韻詩九十一首尤多累句自序

謂隨手塗抹長短得失在所不計諒矣其文亦惟意所如如與陳敷相書引原憲貧也非病之語至以聖賢爲戲更執乎規矩之外矣

克念堂文鈔二卷

江蘇巡撫採進本

國朝雷鐸撰鐸字伯覺蒲城人康熙丙子舉人陝西通志稱其事繼母孝負米他郡以養遇水幾溺嘗終日不食不致母缺於供家雖貧養從兄弟及寡姊妹不少懈朝望聚族人習禮講法以相勸勉蓋亦篤行之士其文章則以人存之耳

殘本賦清草堂詩鈔六卷

江蘇巡撫採進本

國朝張棠撰棠字吟樵華亭人康熙丙子舉人官至桂林府知府告歸後加銜爲太僕寺少卿是編原分五集曰白雲吟曰一肩吟曰獨宏吟曰江上吟最後所作曰雪蓬吟今存者惟江上吟及雪蓬吟餘俱散佚其詩欲以風調勝而骨幹未道

山舟堂集十二卷

江蘇巡撫採進本

國朝周士彬撰士彬字介文婁縣人康熙丙子副榜貢生世居千山其山舟堂額猶趙孟頫手書也此集凡古今體詩一千餘首乃其子忠斡等所刊其論詩以眞朴爲主尤喜讀宋儒語錄故所作如存心養性須常靜莫負吾家太極翁之類皆白沙定山派也

湛園未定彙六卷

浙江巡撫採進本

國朝姜宸英撰宸英有江防總論已著錄此本爲其未入書局以前所自定不及大興黃氏本之完備以別行已久姑附存其目

眞意堂文彙一卷

浙江巡撫採進本

國朝姜宸英撰此本前有秦松齡序言宸英奉纂修之命治裝北上哀爲此集蓋其中年所作初出問世之本

也

苑青集無卷數 浙江 巡撫採進本

國朝陳至言撰至言字山堂一字青崖蕭山人康熙丁丑進士官翰林院編修早年與同郡張遠齋名毛奇齡稱

其能守古人三義八法之意而不變今觀所作以藻緝為主音繁節壯頗似西河集中語宜奇齡之喜其類已也

華鄂堂集二卷江蘇周厚 培家藏本

國朝周彝撰彝字策銘婁縣人康熙丁丑進士官翰林院編修其詩喜作長篇如送張長史君山玩雪遊江心寺

諸作皆灑灑千言才鋒橫溢然律以和平之義往往有乖後附研山十咏別為一卷蓋刊成之後又續入者也

樸學齋詩集十卷福建巡撫 採進本

國朝林佶撰佶有甘泉宮瓦記已著錄佶工於楷法文師汪琬詩師陳廷敬王士禎琬之堯峯文鈔廷敬之午亭

文編士禎之精華錄皆其手書付雕廷敬士禎之集皆刻於名位烜耀之時而琬集則繕寫於身後故世以是

稱之茲集古體詩三卷今體詩七卷淵源有自故體格猶為近古特才分差弱出手微易耳

柳塘詩集十二卷浙江巡撫 採進本

國朝吳祖修撰祖修字慎思吳江人是集乃康熙己卯其子大庚所編後有大庚跋稱祖修在時曾版行五七言

古詩已而悔之謂詩當以編年為次不當分體今所編詩十二卷其半猶出祖修手定也祖修詩頗雅馴嘗作

讀王子淵傳詩有非無聖主賢臣頌只教宮人記洞簫之句後見升菴集中有之喜其閤合因作詩誌之然此

二語太涉論宗本非上乘且慎詩亦即李商隱賈生詩可憐夜半虛前席不問蒼生問鬼神之意亦非新義也

畏壘山人詩集四卷浙江巡撫 採進本

國朝徐昂發撰昂發有畏壘筆記已著錄是集諸體雜編其五言古體大抵刻峭清新一往駿利有透空碎遠之

音而下手太快亦頗乏淳蓄深厚則思銳而才狹之故也

澧懷園全集三十七卷通政司使張若淳家刊本

國朝張廷玉撰廷玉字衡臣號硯齋桐城人康熙庚辰進士官至保和殿大學士諡文和是集為廷玉所自編凡文存十五卷皆乾隆戊辰以前作詩選十二卷皆雍正乙卯以前作載庶集六卷皆乾隆丙辰以後作澧懷園語

四卷則所作筆記也

秋江詩集六卷福建巡撫採進本

國朝黃任撰任字莘田永福人康熙壬午舉人官至四會縣知縣杭世駿榕城詩話稱其工書法好賓客談諧談笑一座盡傾罷官歸里壓裝惟端溪石數枚詩東兩牛腰而已其詩源出溫李往往刻露清新別深懷抱如楊花絕句云到底不知離別苦後身還去作浮萍春日雜思云夕陽大是無情物又送牆東一日春所為緣情綺靡殆於近之而低徊宛轉亦或闖入小詞大致古體不如今體大篇不如小詩故榕城詩話獨稱其七絕蓋才分各有

所長云

秋葉軒詩四卷江蘇巡撫採進本

國朝張琳撰琳字佩嘉一字玉田錢塘人是集乃康熙丙戌其友趙炎所選定集中近體多於古體而七言律詩一種又多於諸體大抵圓熟流利篇篇如一蓋其癖香惟在劔南一集耳

黑蝶齋詩鈔四卷浙江巡撫採進本

國朝沈岸登撰岸登字章九號情耕邵叟平湖人是集乃康熙壬午岸登歿後其從子黼熊所編其詩四百四十餘首其詩瘦削無俗韻而邊幅微狹亦緣於是

樓邨集二十五卷安徽巡撫採進本

國朝王式丹撰式丹字方若寶應人康熙癸未進士第一官翰林院修撰是集乃雍正甲辰其子懋訥所刻分年編次凡龍竿集五卷翠綠集七卷補過齋集二卷忍冬齋集七卷鴻柯集一卷梅花書屋集三卷起壬申迄

欽定四庫全書總目卷一百八十四

丙申每年一卷惟龍筭集之第五卷為其王申以前詩不以冠集而以殿集以少作故也

古劔書屋文鈔十卷

江蘇巡撫採進本

國朝吳廷楨撰廷楨字山掄長洲人康熙癸未進士官至左春坊左諭德是編凡詩八卷末附補遺及詩餘又雜

文二卷乾隆丙子其孫士端刊於貴州其名曰古劔書屋者 聖祖仁皇帝南巡廷楨以舉人 召試 御書古

劔篇以賜因以為名誌榮遇也

緯蕭草堂詩六卷

浙江巡撫採進本

國朝宋至撰至字山言商邱人吏部尚書華之子康熙癸未進士官翰林院編修初刻有緯蕭堂詩一卷附舉集

後此其全集也至承其家學兼得新城王士禎之傳故其詩派亦介出於父師之閒但才與學均未及耳集中孔

雀聯句父子同為之蓋用蘇軾與子過聯句例也

續學堂文鈔六卷詩鈔四卷

兩江總督採進本

國朝梅文鼎撰文鼎有歷算全書已著錄其以續學名堂者初大學士李光地嘗薦文鼎於朝康熙乙酉恭逢

聖祖仁皇帝南巡文鼎迎 鑾道左蒙 召對 御書續學參微四字賜之因以名堂併以名集也然文鼎測

驗推算諸法皆足以自傳於後詩文特其餘事非所擅長蓋算術雖一藝而非以畢生之精力專思研究則莫

造其彼雖超特絕世之姿其勢不能以旁及張衡深通歷算妙契陰陽至能作候風地 動儀而文章博麗又能

凌轅植蔡之閒千古一人而已自洛下閱鮮于妄人以下淳風一行亦未能以詞采著也斯亦物不兩大之理

矣

滋蘭堂詩集十卷

浙江巡撫採進本

國朝沈元澹撰元澹有禮記類編已著錄是編分六集曰康瓠集灌畦集今兩集紫貝集勞薪集西征集前有其

孫廷芳題識稱康瓠集為家居侍親及為查氏贅婿時作灌畦集為移居龍山時作今兩集為入直 武英殿時

作紫貝集爲官文昌時作勞薪集爲罷官後自京赴粵時作西征集爲由粵赴京謫居銀州時作元滄爲有異之
壻久與查慎行遊故其詩格頗近初白堂集云

澹初詩彙八卷附見山堂詩鈔一卷 編修程晉芳家藏本

國朝沈翼機撰翼機字西園號澹初海寧人康熙丙戌進士官至翰林院侍讀學士詩分十集曰謀野集曰新安
集附黃山紀遊百詠皆翼機爲諸生時作曰瀛洲集丹莩集皆館選後作曰蜀使草康熙甲午典試四川時作曰
熙使草康熙丁酉至庚子爲貴州學政時作曰江右使草雍正癸卯至丙午爲江右學政時作曰兩山集乞假歸

田後作曰觀光集乾隆元年翼機復補原官後作曰游衍集則致仕後作也附見山堂詩鈔一卷爲其子廷薦之
作廷薦字澄懷雍正壬子舉人未仕早卒僅存詩六十餘首

集虛齋學古文十二卷 浙江巡撫採進本

國朝方絜如撰絜如有離騷經解已著錄其制義最有時名而散體之文亦頗與勁有筆力然喜雕琢新句變積
古辭遂流爲別派蓋其制義亦喜以新穎爲工天性然也

親齋詩選二卷 山東巡撫採進本

國朝張謙宜撰謙宜號稚松膠州人康熙丙戌進士是集末有法輝祖跋謂全彙三千餘首暮年自訂存詩四百
餘篇自序凡十言極述其苦吟之狀然其詩出入於香山劔南之間一吟一味亦足自娛起而抗衡古人則力尙
不逮也

蓼村集四卷 編修周永年家藏本

國朝王萃撰萃字秋史歷城人康熙丙戌進士其詩爲王士禛田雯所稱而文不甚顯乾隆癸巳桂林胡德琳得
其本於歷城周氏爲刪訂付梓德琳爲之序稱原本分甲乙二集自癸亥至庚子三十四年之作各自編年惟辛
丑以後之文無存今仍其舊編爲四卷乙居四之一惟書記傳註干支於本目之下使後人有所考焉

雪鴻堂文集二卷 山東巡撫

採述本

國朝李鍾義撰鍾義號芝麓通江人康熙丙戌進士官翰林院檢討是集乃其督學福建時所編凡賦頌一卷詩一卷多館課及應酬之作案鍾義父蕃有雪鴻堂集其兄鍾璽集襲用其名鍾義又襲用其名殊不可解如以為家乘之總名則又各為卷第例亦難通也

王石和文集 無卷數 山西 巡撫採述本

國朝王璠撰璠字石和字韞輝孟縣人康熙丙戌進士官翰林院檢討是集多議論之文筆意亦頗縱橫其記周遇吉死節事謂賊兵攻城急城將陷賊募獻遇吉者遇吉謂左右曰豈惜一死以累家可獻我兵民環泣眾遂以繩繫公下有兩賊掖之去公見賊罵倒懸演武廳磔之云云與明史本傳不合又以好魴廟為田子方廟與朱彝尊碑不合其最異者如文昌閣碑記謂孔子不得帝君之教天下將有悖心反道肆然於日用倫常之際而不復以天地日月為可忘者尤不可為訓也

十峯集五卷 江蘇周厚 靖家藏本

國朝徐基撰基字宗頊華亭人由貢生官訓導是集自詩賦文及填詞皆集前後亦壁賦中字錯綜盡變極有巧思若其中遊小赤壁賦春日遊小赤壁賦及道德篇諸作皆洋洋數千言而伸之縮之不出四百餘字之外雖才人狡獪不足以語大雅而專門之技別開奧突亦詞苑中之奇作互古所未有者也末卷做梁簡文蘇蕙蘭古聲鑑圖及宋庠寄范仲淹諸迴文皆有思致卷首有康熙丙戌陳元龍序序集聖教序中字亦如自己出以弁此集可云勁敵然元龍特偶一為之尚無不可基則弊一生之精神成此一集可謂宋人之楮葉矣

蓬莊詩集六卷 江西巡撫 採述本

國朝沈虹撰虹字涓梁長洲人是集其所自編以作詩先後為次起康熙丁亥訖雍正甲辰古今體共五百四首每卷之前皆有小引紀其歲月及所閱歷遭逢

雄雉齋選集六卷 江蘇周厚培家藏本

國朝顧圖河撰圖河字書宣江都人康熙己丑進士官翰林院編修圖河為江左十五子之一其詩古體多學眉山近體多學劬南詠物諸作亦頗新穎而在同時諸人之中尙未能籠罩一切也

青溪詩偶存十卷 江蘇巡撫採進本

國朝蔣錫震撰錫震字豈潛宜興人康熙己丑進士是集分二十二種曰報耕草北征集渡河集贅臈集北游草楚游草還山草汗漫吟北行草歸耕草草江草還山草後北游草涉江草洛遊草灌園草游燕草廬中吟後草江草還山吟金臺草學製集自己己至壬寅凡三十四年之作皆以年編次

退谷文集十五卷詩集七卷 兩江總督採進本

國朝黃越撰越字際飛上元人康熙己丑進士改庶吉士所著四書大全合訂及選刻制義如明文商今文商墨卷兩考卷商之類皆盛行一時蓋平生精力注於講章時文此集所著詩古文乃以餘暇兼治者其尙書古今文辨惟以蔡傳折服諸家三傳得失辨惟以胡傳斷制衆論亦仍舉業繩尺也

圭美堂集二十六卷 浙江巡撫採進本

國朝徐用錫撰用錫字畫堂宿遷人康熙己丑進士官翰林院編修是集詩十卷文十六卷乃其族子鐸及門人周毓崙所校刊用錫從學於李光地作文以樸澹為長生平書法頗工集中字學割記二卷皆自道其心得其他題跋亦辨論法帖手跡者居多

青要集十二卷 浙江巡撫採進本

國朝呂謙恆撰謙恆字天益河南新安人康熙己丑進士官至光祿寺卿謙恆嘗讀書青要山因以名集其詩純作宋格疎爽有餘而亦頗傷樸直如洗象行之類皆病於太質

吾廬遺書 無卷數江西巡撫採進本

國朝陶成撰成有皇極數鈔已著錄是集為其子其懋所編皆所作雜文頗純正有軌度而稍狹於波瀾其中象

緯考一籍有錄無書意傳寫佚之或訂定時刪去而誤留其目也

性影集八卷 江蘇巡撫採進本

國朝王時憲撰時憲字若干號禊亭太倉人康熙己丑進士由宜興教諭改翰林院庶吉士是編凡八集集各一

卷曰水邊林下彙曰桐溪彙曰無隱林彙曰靜寄軒彙曰莊澗彙曰荆溪彙曰楚遊彙曰粵遊彙其名性影者蓋

取邵子情為性影之說也集中近體頗饒風致擬古諸作則隨意抒寫不甚求工

改堂文鈔二卷 江蘇巡撫採進本

國朝唐紹祖撰紹祖字次衣江都人康熙己丑進士由庶吉士改刑部主事官至湖州府知府仍入為刑部員外

郎告歸卒紹祖少師姜宸英登第出安溪李光地之門故其文蒼勁有師法此集乃晚年手自刪定僅存四十三

篇皆其生平得意之作也

石川詩鈔三卷 浙江巡撫採進本

國朝方觀煥撰觀字近雯江都人康熙己丑進士官至西安布政使是集乃其少子柱山所編凡各體詩二百六十

餘首其題朱彝尊手書詩冊有曝書亭下自鈔詩想見蒼茫獨立時不是到門親受業唐音宋格有誰知蓋嘗從

學於彝尊者也

師經堂集十八卷 浙江巡撫採進本

國朝徐文駒撰文駒字子文鄞縣人康熙己丑進士是集為文駒所自編凡文十三卷詩五卷前有孫勳序稱其

濬伊洛之淵源採韓歐之骨髓沈浸釀郁積有年歲自序亦主於自達其情今觀其集滔滔而出足以暢所欲言

然未能固而存之也

墨澗亭集 撫卷數江西巡撫採進本

國朝帥我撰我字備皆號簡齋奉新入康熙辛卯舉人江西古文自艾南英倡於前魏禧等和於後踵而起者雖所造深淺不同而大都循循有舊法是集亦其一也舊刊版於南昌所載未備雍正乙卯其子念祖屬徐廷槐彙取已刻未刻諸藁哀爲此本凡一百四十篇

殘本雲川閣詩集九卷 南江總督採進本

國朝杜詔撰詔字紫綸無錫人康熙乙酉 聖祖仁皇帝南巡迎 鑾獻詩 命供職 內廷壬辰會試榜後

特賜一體殿試改庶吉士是編總題雲川閣集而僅有古體詩詩又起於卷三終於第十二前無目錄其版又

近時新刻不喻其改或裝緝者伏之耳

聞邱詩集六十卷 南淮馬裕家藏本

國朝顧嗣立撰嗣立有溫飛卿詩註已著錄江南通志文苑傳稱嗣立博學有才名尤工詩所居秀野草堂書集

四方知名士錫詠無虛日風流文雅照映一時曾撰元詩選四集採摭略備益其性之所近故詩亦往往似之

今有堂詩集六卷附茗柯詞一卷 編修程晉芳家藏本

國朝程夢星撰夢星字午橋號香溪江都人康熙壬辰進士官翰林院編修家有篔簹園擅水竹之勝日與賓客吟

詠其中年七十七乃卒是編分六集曰漪南集蠡餘集五現集山心集琴語集就簡集末附茗柯詞其詩略近劔

南一派而開出入於玉溪生詞亦具南宋之體但格力差減耳

二水樓詩集十八卷文集十卷 江甯巡撫採進本

國朝李茹曼撰茹曼字覆如臨川人康熙癸巳進士官中書舍人嘗預修廣西通志撫州府志所作凡例及諸傳序

皆載集中

朱圉山人集十二卷 陝西巡撫採進本

國朝章建豐撰建豐字子文號渭川又號介亭伏羌人康熙癸巳進士官至翰林院侍讀學士是集詩文各六卷又

大定四年全作... 卷一百八十一 集部

以補遺之文附於詩末大抵平實簡易無擅勝之處亦無踳駁之處

三華集四卷 兵部侍郎紀昀家藏本

國朝梁機撰機字仙來泰和人康熙癸巳進士是集機所自編分四子部一曰入洛志勝多題詠古蹟之作一曰燕

雲詩鈔隨侍其父宦游京邸之作皆壬士顧選定一曰徵草則乾隆元年薦舉博學鴻詞 召試入都之作一曰還

草則試不入格歸途之作也

練溪集五卷 山東巡撫採進本

國朝傅米石撰米石字立元鉅野人康熙癸巳舉人是集凡文二卷詩二卷雜記一卷前有其門人李包序後有其

子爾德所作家傳其古文頗謹嚴有法度如琢磨偶記序誤以碧雲駁為白嶽隨引據 或疎管蔡論謂周公勝季

友殊為贅衍季札論責 以當為伯夷泰伯之逃亦為吹索然其他率不失 醇正雜說持論亦平允其曰讀書之人

屏伏田里不敢為畸邪之行不敢為詭激之論不敢著非聖之書謹身力行以為齊民先是即所以報君父可謂

有德之言其誤以鉤駟為蟬之類特小失耳惟 古詩以文筆為之猶未乖大雅近體則皆不入格 甚至以海若押

入馬韻是簡若之若也以刻鏤讀為平聲是屬鏤之鏤也吟詠非所擅長而雜然編錄轉為全集之累是則其後人

之過矣

約園詩鈔二卷 福建巡撫採進本

國朝郭雍撰雍字仲穆一字普禪福清人約園其號也康熙癸巳舉人是集各體詩共二百餘首雍自謂前後所作

多屬近體於古體歌行間存一二樂府則有待而未及今觀其詩惟五言律詩頗有局度餘皆平平詩不沿溯於古

而先求之偶儷之格終不能採其本也

瓦缶集十二卷 浙江巡撫採進本

國朝李宗渭撰宗渭字秦川嘉興人康熙癸巳舉人初於康熙丁亥自編其詩為瓦缶集三卷後又有永懷集一

卷附刻以行宗渭沒後其婿高衡乃哀其遺詩編爲樂府一卷古體九卷近體二卷仍以瓦缶爲名從其初稱也其詩古體多於近體五言多於七言大旨以漢魏六朝唐人爲法而不肯爲宋元之格故字句率有古意昔人論林鴻之詩如唐摹習帖者其庶幾乎

若菴集五卷 兩江總督 採進本

國朝程庭撰庭字且碩號若菴歙縣人是集文一卷次詩一卷次詩餘一卷次停驂隨筆一卷康熙癸巳庭至京祝釐隨日記行所作附以詩詞次春帆紀程一卷則自揚州至歙往返所作亦有詩詞附焉

嗜退山房彙五卷 江西巡撫 採進本

國朝帥仍祖撰仍祖字宗道號介亭山人奉新人是集乃仍祖自編其康熙癸巳甲午二年所作凡詩二卷文三卷

空明子詩集十卷又八卷文集六卷又二卷雜錄一卷詩餘一卷 江蘇巡撫 採進本

國朝張榮撰榮字景桓華亭人自序謂生平共得古文雜作六百餘首詩三萬餘首詩餘一千五百餘首歌謠三百餘首康熙甲午檢出盡付祖龍僅存三十分之一卽是編也詞意多放曠不羈

挹青軒詩藁一卷 江蘇巡撫 採進本

國朝華浣芳撰浣芳蘇州女子華亭張榮之妾也年二十三而卒榮刊其遺詩自爲作序述其九歲時夢見唐太宗召有唐一代諸詩人教之作詩其事甚怪榮好爲遊戲之文殆亦寓言耶

龍溪草堂集十卷 山東巡撫 採進本

國朝王世睿撰世睿字道存章邱人康熙乙未進士官上海縣知縣世睿初改庶吉士及散館仍外補故是集多館課之作至第九卷金陵宦業中八勒八戒詩意求通俗然太質勝於文矣

陳玉凡詩集三卷 禮部主事任 大椿家藏本

國朝陳揆撰撰字楞山號玉几鄞縣人以書畫遊江淮閒寤愁寡合故其詩多悽斷怨唱之音是編刻於康熙丙申蓋其中年所作首曰繡欵集一卷次曰玉几山房吟一卷次曰玉几山房擬古詩一卷皆冥冥獨造如其為人雖未及古要能離俗惟擬古詩中多載勝流評語仍沿明末山人之習耳

雲溪文集五卷

兩江總督採進本

國朝儲掌文撰掌文字曰虞一字越漁立與人康熙丁酉舉人官四川納溪縣知縣納溪舊名雲溪故掌文以雲溪自號是集又名雲溪隨筆自儲欣以古文詞有名其家父子兄弟多以此相鑠厲掌文為欣之孫得其指授為多今世所傳欣選左國史漢及唐宋十家文即其甄錄以授掌文者也

據梧詩集十五卷

兩淮馬裕家藏本

國朝管楡撰楡有師宗州志已著錄是編凡吹萬集二卷柏軒草二卷修琴閣集二卷鷗馴集二卷天外集二卷國華集二卷寓齋稟三卷邵長蘅序稱其詩先學劔南後學少陵今觀所作大抵先入者為主也

近道齋文集六卷詩集四卷

吏部主事張慎和家藏本

國朝陳萬策撰萬策字對初一字謙季安溪人徙於晉江康熙戊戌進士官至詹事府詹事敘事降翰林院檢討終於侍讀學士萬策以康熙癸酉舉於鄉困公車者二十六年久從李光地游多得其指授然平生詩文多散佚不收此本乃乾隆癸亥其子見世所輯其中西洋算法異同論頗能究其所以然李光地施琅諸傳軼聞舊事亦多可考云

白田草堂存彙二十四卷

兩江總督採進本

國朝王懋竑撰懋竑有白田雜著已著錄是集凡文二十卷詩四卷末附行狀一篇其學長於考證故全集以雜著為冠詩文則未能過人其與方苞書自謂筆力拖沓不近古人所謂人之知我不如我之自知亦足見其學問之篤實也

莊元仲集一卷

福建巡撫採進本

國朝莊亨陽撰亨陽有算學已著錄此集僅文十二篇乃其官淮徐道時所上河防條議也

綠蘿山房文集二十四卷詩集三十三卷江蘇巡撫按進本

國朝胡浚撰浚字希張號竹巖會稽人康熙庚子舉人是編文皆駢體浚自為之註前有魯會煜序稱仿韓非子有經有傳例然韓非子經傳各自為條其著書句下自註者始班固漢書藝文志作文句下自註者始謝靈運山居賦浚益用靈運例也

寒香閣詩集四卷山東巡撫採進本

國朝鄧鍾岳撰鍾岳有知非錄已著錄是集為乾隆乙亥其子汝功汝敏所編凡古今體詩一百九十二首其詩頗濃厚和平無血脈僂張之狀而材地稍瑋尙未能顛頑古人

墨麟詩十二卷浙江巡撫採進本

國朝馬維翰撰維翰字墨麟海鹽人康熙辛丑進士官四川東道其詩以縱橫排募為長意之所向不避險阻然神鋒太備者居多

秋陞文鈔十二卷三州詩鈔四卷浙江巡撫採進本

國朝魯會煜撰會煜字敬人秋陞其別號也會稽人康熙辛丑進士改庶吉士未授職乞養親歸教授生徒終於家是集文一百二十一篇中多考證之作其文氣頗劇急益才性使然若續中山狼傳之類雖規樞毛穎然不作可也目列易本末論六十四篇易纂例八十篇而有錄無書蓋均未刻又廣東祥符二志凡例亦有錄無書殆以已見於兩志歟其詩以三州名集自序曰杭州汴州廣州也蓋其歷主講席游蹤所及之地云

最古圖二編十八卷江蘇周厚培家藏本

國朝羅人琮撰人琮字紫蘿湖南桃源人康熙辛丑進士官至監察御史是集人琮所自定其云二編以尙有初刻最古圖集二十四卷也然其初刻今未之見此集詩文則大抵以才氣用事曼衍縱橫者也

陸堂文集二十卷詩集十六卷續詩集八卷浙江巡撫採進本

國朝陸奎敷撰奎敷有陸堂易學已著錄是集前有自序謂在長洲任魏秀水朱彝尊之閒其文內序問考辨諸篇亦頗博辨然說經好爲異論頗近毛奇齡尙不及琬與彝尊也

唐堂集六十一卷

江蘇巡撫採進本

國朝黃之儔撰之儔有香肩集已著錄是集凡五十卷又補遺二卷續集八卷皆之儔所手編各有自序末附冬錄一卷則所自撰年譜也之儔之學排陸王而尊程朱多散見所作詩文中持論甚正而綜覽浩博才華富瞻興之所至下筆不能自休往往溢爲狡獪游戲之文不免詞人之結習又名與旣盛贈答遂繁率應酬不能割愛榛楛勿剪所存者不盡精華譬之古人殆陸機之患才多矣

雲在詩鈔九卷

浙江巡撫採進本

國朝查祥撰祥字星南海寧人康熙辛丑進士官翰林院編修祥早歲嘗舉博學鴻詞晚乃登第年至八十餘而歿詩集未經刊行此流傳寫本也

小蘭陔集十二卷

福建巡撫採進本

國朝謝道承撰道承字又紹號古梅閩縣人康熙辛丑進士官至內閣學士兼禮部侍郎是集詩十卷文二卷道承假歸養親故取南陔補亡詩語名集而集中所載則應制館課之作皆在焉不專家居作也其中碑帖題跋亦頗具鑒賞

桐村詩九卷

江西巡撫採進本

國朝馮詠撰詠字夔殿金谿人康熙辛丑進士官翰林院編修是編一卷爲一集一曰江漢集二曰日下集三曰章江集四曰南海集五曰南海二集六曰公車集七曰玉堂集八曰京口集九曰黔中集分年編次各以作詩之地爲名始於康熙癸巳迄於雍正己酉共十七年之詩前有自序題康熙甲午葢江漢集之序刊版時取冠全詩

兩

崇德堂集八卷 直隸總督 採進本

國朝王植撰植有四書參註已著錄此集植所自編其學上於敦勵名節而事事有濟於物故集中所載多居官

案牘之文頗足見其生平其考論經籍則好以意推理斷不能一一徵於古也

偶存草 無卷數 直隸 總督採進本

國朝王植撰是集亦植所自編植喜講學故其詩全洽擊壤集之派

精東雜著一卷 浙江巡撫 採進本

國朝王汝驥撰汝驥字雲衢所刻制義或自書曰云劬又自書曰耘渠皆以同音假借也金壇人由貢生官通江縣

知縣此編乃所作古文其以牆東為名蓋用後漢王君公事汝驥掉鞅文壇事殊牛僧殆以其王姓斷章取義耶文

凡二十一篇前六篇皆經說後十五篇則皆史評也其術序記謂學記術有序即遂也辨舊志讀術為州之非考春

秋秦伯使術來聘公穀作使遂則汝驥之說實閤合古義其苟或論上下二篇反覆推獎以為有道之士則過矣

與梅堂遺集十二卷 江蘇巡撫 採進本

國朝佟世思撰世思字儼若正藍旗漢軍以蔭生官思恩縣知縣是集凡詩十卷詞一卷雜文一卷其弟世集哀而

刻之末附耳書一卷皆記所聞見荒怪之事分人物神異四部雜話一卷則以公事至恩平而記其風土也

金蘭齋集十二卷 江蘇巡撫 採進本

國朝金欽撰欽字廓明號開齋武進人其學出於東林是書首載家訓紀要次點齋湯先生述略次其學山居會

約次自知日錄次讀史筆記次古今體詩次雜著次可凡編次客憲偶記次師古約言次宗約宗範其中家訓紀

要一卷乃其父所制記以訓子孫敬更纂而錄之故冠首云

前溪集十四卷 浙江巡撫 採進本

國朝唐培撰培字問宣武康人康熙中諸生是集詩八卷文五卷二集詩一卷其詩頗具風骨閒傷率易其文亦

然五卷論水利樂律諸條則科舉蒼篆之類耳前溪在武康縣治南源出銅峴山在六朝為繁會地所謂前溪舞

者是也

華林莊詩集四卷

江蘇巡撫採進本

國朝姚孔鑄撰孔鑄字梁貢號子巢桐城人康熙中諸生其詩七言絕句工於寫景如垂楊枝上鶯啼蝶撼得飛花破水痕之類亦殊有晚唐風味所謂香車金犢陌上畱連者也至黃雲白雪門前路蔣麥田中作菜花之類則

刻畫太甚無情景交融之致矣

楓亭山人詩集十七卷

檢討蕭芝家藏本

國朝夏熙臣撰熙臣字無易孝感人七歲補諸生以成貢官安陸府教授初著有巢雲閣詩十五卷後增以新作重編為此集其詩才情富贍故往往往墨韻至五六又和阮籍詠懷擬李東陽樂府殆邇然連篇累幅瑕瑜不免互

見亦所謂武庫之兵利鈍互陳者矣

道煦堂詩集四卷

江西巡撫採進本

國朝曹煜曾撰煜曾號麓荷上海人康熙末貢生是集為其孫錫寶所編石倉世纂之第一種也凡詩一百五十五首煜曾為雲間董俞弟子故其詩聲律格調頗有師法然卷中但存近體而無古詩王延年序稱其懶不自惜

散佚頗多今所傳者皆其孫口授豈訓課時惟取聲律諧適易於記誦故耶

長嘯軒詩集六卷

江西巡撫採進本

國朝曹煥曾撰煥曾字祖望號春浦上海人康熙末貢生炳曾之弟也是集為石倉世纂之第二種凡詩四卷後附詩餘一卷雜著一卷其生平所注意者在於詩餘辨體其詩亦專學晚唐以纖麗自喜

放言居詩集六卷

江西巡撫採進本

國朝曹炳曾撰炳曾字為章號果甫上海人康熙末諸生煜曾之從弟也是集為石倉世纂之第三種凡詩五卷後

附雜著一卷并從子一士所撰墓誌銘其詩與煙會道原堂集格律相近而才地稍遜焉

隨村遺集六卷

江西巡撫採進本

國朝施璵撰璵字隨村宣城人侍讀閣章之孫也此集為杭世駿所編其詩酷學其祖而風格稍峭遺幅稍狹則根柢之深厚不及也

有懷堂詩文集一卷

江西巡撫採進本

國朝田肇麗撰肇麗字念始號蒼厓戶部侍郎雲之子官戶部郎中肇麗負倚才而屢試不第其入官也以任子故述懷詩有慚非科名人句蓋吟咏之閒嘗以是耿耿云

靜便齋集十卷

浙江巡撫採進本

國朝王曾祥撰曾祥字慶徵仁和人康熙末諸生與厲鶚金農諸人相唱和是集前五卷為詩後五卷皆雜文靜便齋者館於義橋陳氏時所甘取謝靈運還得靜者便句名之有所為記見於集中前有雷鉉所撰兩王生小傳一謂會祥一謂江都王世球也

鍾水堂詩三卷

山東巡撫採進本

國朝顏肇維撰肇維字次雷曲阜人官臨海縣知縣是集乃其官浙東時所作多學南宋諸家

帶月草堂詩集一卷

山東巡撫採進本

國朝顏懷禮撰懷禮字約亭曲阜人襲世職為五經博士好學喜為詩早年天逝故骨格未成此集為其弟懷繹所編前有康熙後壬寅嶧縣李克敬序亦稱天假以年俾盡其勤何遽不如鑿肝斷髓者之所為也

青嶼棗存

無卷數浙江巡撫採進本

國朝張安絃撰安絃字琴父烏程人其文以才氣勝而喜事塗澤詩則音節疎放亦未能磨礪圭角

桐乳齋詩集十二卷

浙江巡撫採進本

缺定四庫全書總目卷一百八十四

集部

別集類存目上

七

國朝梁文瀛撰文瀛字紹父錢塘人大學士詩正文也是集凡詩九百餘首而同時唱和諸作亦附錄杭世駿序稱其壯時南浮衡湘北抵碣石踐歷嵩華迴旋宋衛之郊蓋頗耽懷山水者故記游之詩為最多焉

梅村集四卷

山東巡撫採進本

國朝朱翱撰翔字子青號稼村歷城人候補主事嘗學詩於王士禛所作具有法程而早年天逝故骨格未成是集分四種曰風香集曰吳船書屋集曰觀稼樓詩曰雲根清壑集自吳船書屋以下皆士禛之所評定也

蒼雪山房彙一卷

山東巡撫採進本

國朝朱綱撰綱字子鳴歷城人官至福建巡撫與兄細絳皆學詩於王士禛是集亦士禛所評定詩頗清淺蓋少作也

吾友于齋詩鈔八卷

浙江巡撫採進本

國朝張錫爵撰錫爵字擔伯號中巖嘉定人寄居吳江是集前有雍正乙巳張雲章序題曰原序蓋為其舊稟面作又有乾隆辛酉朱稻孫序則刊此本時所作其詩酷摹王士禛亦往往得其一體其齋名吾友于者取杜甫岳麓寺詩山鳥山花吾友于語也

欽定四庫全書總目卷一百八十五

集部三十八

別集類存目十二

蔗尾詩集十五卷文集二卷福建巡撫採進本

國朝鄭方坤撰方坤有經稗已著錄方坤天分既高記誦尤廣故其詩下筆不休有凌厲一切之意尤力攻嚴羽
滄浪詩話詩不關學之非然於澀字險韻恆數十疊雖閒見層出波瀾不窮要亦不免於炫博此又以學富失之
所謂矯枉者必過直也其詩凡分十五集曰刪餘草曰公車草曰木石居草曰公車後草曰木石居後草曰丁年
小草曰蠶畫稟曰春明草曰廣川稟曰酒市稟曰一粟齋稟曰瓶花齋稟曰杞菊軒稟曰詩話軒稟皆古今體詩
曰青衫詞則詩餘附錄者也文集二卷亦大抵儷體居多蓋其根柢在六朝也

樹人堂詩七卷江西巡撫採進本

國朝帥念祖撰念祖字宗德號蘭臯奉新人雍正癸卯進士官至陝西布政使緣事謫戍軍臺沒於塞外是集前
有何焯序稱念祖塞上所作有多博吟今未見此七卷則念祖官陝西時所自編也念祖以時文鳴一時務以幽
渺之思擺脫陳因其詩亦清刻不俗但平生精力盡於八比徒以餘力為之未能自成一隊耳

涵有堂詩文集四卷福建巡撫採進本

國朝游紹安撰紹安號心水福清人雍正癸卯進士官至南安府知府是集詩二卷文二卷紹安守南安幾二十
年故詩文多南安所作其文務為奇崛語詩亦欲以生僻見長

南陔堂詩集十二卷獨修徐天柱家藏本

國朝徐以升撰以升字階五號恕齋德清人雍正癸卯進士官至廣東按察使是編為其孫天柱天驥所刊分年
編次日學步集雪泥集湘灘集秋帆集夢華集忽至草黃樓草岫岫草南還集黔游草煙江疊嶂集閒閒集凡十

二種

王已山文集十卷別集四卷

江蘇巡撫探進本

國朝王步青撰步青有四書本義匯參已著錄金壇王氏以八比稱於世者凡六人所謂王氏六子是也六子之中汝驥及步青名尤著汝驥文神思滄遠取徑單微步青則法律嚴謹不失尺寸在近時號為正宗於古文則餘力及之非所專門也其集原名竹里草堂遺藁乃步青沒後其子士鼐所編後寧化雷鉉督學江蘇時從士鼐取其藁本重為刪定凡存九十餘篇勒為十卷用步青別號改題今名又別集四卷皆其時文選本之序論則士鼐稟輯編次附刊以行蓋步青困諸生者二十餘年至康熙甲午乃舉於鄉往來公車又十年至雍正癸卯始成進士旋以病乞歸里居教授惟以評選時文為事平生精力盡在於是故講論時文之語至於積成卷帙論文之書自擊虞文章流別後凡數百家其專論場屋程式者則自元倪士毅作義要訣始自為一編於例當入詩文評類以其原附本集之末故仍其舊焉

江營草堂詩集八卷

浙江巡撫探進本

國朝金志章撰志章字繪尚仁和人雍正癸卯舉人官至口北道是編分七集曰敝帚曰梅東曰始游曰鏡中曰曉雲曰谷雲曰瀟浦歸耕其詩五言古體多近蘇軾七言古體多近溫庭筠近體多近陸游范成大

離齋詩藁二卷補遺一卷

浙江巡撫探進本

國朝曹庭樞撰庭樞字六菴嘉善人雍正癸卯副榜貢生乾隆元年當薦舉博學鴻詞集中載有 午門謝頌月 廩恭紀詩卽其事也是集亦皆其游京師時所作

司業文集四卷

江蘇巡撫探進本

國朝陳祖范撰祖范有經咫已著錄其為文不規規於摹古而學有根柢暢所欲言亦自合古人法度其中如方孝孺死節論讀禮記述史述欽用喪服議陳貞女合葬議王罕皆文集序汪西京文集序王次山詩序樂府解皆

有可觀而如記昌黎集後務爲新論別號舍文忽作俳體松筠堂宴集詩序雜以儷詞又多收一切應俗之作蓋
繡錄時務盈卷帙一概登載未免失於刊除使簡汰精華十存三四豈不翹然作者哉

司業詩集四卷

江蘇巡撫
採進本

國朝陳祖范撰前有日序題乾隆壬申而第四卷乃題自乙丑至甲戌詩蓋又有所續入如古人後集別集例也
其詩直抒胸臆不煩繩削於古人中去白居易爲近秋陶孫所謂事言言皆著實者也白序有日詩之作出於
無心則其情真又必各有所爲則其義實故一國之事繫一人之本而匹夫匹婦之歌吟可以察治忽也其論洞
悉本原非明以來彫章刻句之流所能見及又云後之詩人既以詩自命人亦以詩相屬於是外物爲主而詩役
焉詩爲主而心役焉於是無真性情真比興然而情實彌隱詞采彌工義理彌消波瀾彌富而又格律以繩之派
別以嚴之時代以區分之回視詩教之本來其然乎其不然乎其論亦切中流弊劉勰所謂古之詩人爲情而造
文今之詩人爲文而造情者祖范所言殆庶幾焉然文以載道理不可移而宋儒諸語錄言言誠敬字字性天卒
不能與韓柳歐蘇爭文壇尺寸之地則文質相宜亦必有道矣觀祖范之序而其詩所長所短蓋可以想見也

王良齋集十四卷

江蘇巡撫
採進本

國朝王峻撰峻字次山常熟人雍正甲辰進士官至江西道察院御史是編凡詩十卷文四卷其吳中先哲諸傳
則修蘇州府志時所撰亦併附之集中云

鋤經餘草十六卷

侍講劉亭
地家藏本

國朝王文清撰文清有周禮會要已著錄此其所作詩集前有論詩法十條則其平生心得之語而其門人錄以
冠集者也

明史雜詠四卷

浙江巡撫
採進本

國朝嚴遂成撰遂成字海珊烏程人雍正甲辰進士官雲南知州詠史之作起於班固承其流者唐胡曾周曇皆

用近體明李東陽則用樂府體遂成此編賦明一代之事古體近體相間故名曰雜詠嚴震直一首力辨史彬致身錄之誣雖子孫之詞實則公論至於劉三吾一首謂太祖欲立燕王為三吾所沮釀靖難之禍不為無見至周公成王本一家事猶賢於王莽篡句則謬矣姚廣孝二首盛推其功比以蕭何李泌且有特地開科長取士不知漏落幾多人句王越王驥王瓊三首謂三人之交結宦侍乃借其陰助以濟國事非為身家之計比之郭子儀之俯仰魚朝恩持論皆有意抑揚故翻定案李夢陽一首詞多詆斥併有附記曰北地雖非西涯門人然如王九思以仿西涯體中選其餘諸子多有親承指授者皆奪於北地之焰改轍背之猶之北地背之也云云夫文章公器各自成家原非為植黨報恩之地況夢陽與東陽本風馬牛不相及而忽坐以背東陽之罪尤未免深文鍛鍊謹明末門戶之舊論矣

絳耐閣詩彙十一卷 浙江巡撫採進本

國朝諸錦榷錦有毛詩說已著錄是編古今體詩分三十一集自康熙甲申至乾隆壬午五十九年之作共一千五百餘篇

賜書堂詩逸八卷 編修吳詩曰家藏本

國朝周長發撰長發字蘭坡別號石帆會稽籍山陰人雍正甲辰進士選庶吉士散館外補廣昌縣知縣又改樂清縣教諭乾隆丙辰 召試博學鴻詞授檢討官至侍講學士後降補侍講長發詩才敏捷操筆即成故富贍有餘而亦微傷於快平生所作詩逾萬首此集八卷蓋汰存十之一云

小山全彙二十卷 江蘇周厚培家藏本

國朝王時翔撰時翔字臯謨一字抱翼號小山鎮洋人雍正戊申由諸生薦舉授晉江縣知縣官至成都府知府是集凡詩彙八卷詩餘四卷文集八卷詩彙分初續後三彙詩餘分五集曰香齋曰紺寒曰青葢樂府曰初禪綺語曰旌亭夢野

就正草一卷 江西巡撫採進本

國朝徐壘撰號雷谿進賢人雍正乙酉投貢是編乃其文集前題云續刻就正草則必先有初刻今未之見前有吳士玉序而卷中有祭士玉文殆刻在序後耶

松源集 無修歟二兩江總督採進本

國朝孫之騷撰之騷所輯尚書大傳已著錄是集凡五種其題曰松源紀行者初取道富春赴慶元任作也曰龍泉舟中雜記者歲試至處州作也曰經說者告諸生五經源流紀也曰敦行錄者與諸生立條約及經傳雜訓也曰雜文者其酬應之作也集刻於雍正己酉庚戌間慶元古松源地故以為是集之總名焉

春及堂詩集四十三卷 太常寺卿倪承寬家藏本

國朝倪國璉撰國璉有康濟錄已著錄是集乃乾隆壬辰其子承寬所刊凡竹立園集一卷南隱山房小草一卷橘

山游草二卷文杏館集一卷浮滿集一卷楓花草一卷松鱗書屋唱和詩一卷庚子詩草一卷刺東游草一卷廬江

游草二卷西江游草三卷南游草二卷湖南吟藁二卷燕雲集一卷竹窗集三卷滇行集八卷春聞詩一卷星沙

奉使集二卷潞河吟一卷庚申南行集三卷嘉隆書屋集三卷皆國璉嚴自刪汰惟存其得意之作故每卷多者

不過四十餘首少者或十餘首云

四馬齋詩集六卷附梯仙閣餘課一卷拂珠樓偶鈔二卷 江西巡撫採進本

國朝曹一士撰一士字誇庭號濟寰上海人雍正庚戌進士官至兵科給事中是編乃其詩集石倉世纂之第四種

也附載梯仙閣餘課為一士繼室陸氏鳳池作刻於康熙壬辰又拂珠樓偶鈔一士之女錫珪所作刻於雍正甲寅

四馬齋文集八卷 江西巡撫採進本

國朝曹一士撰石倉世纂之第五種也與其詩集同刻於乾隆庚午其論文之旨謂古文之所以稱古者乃意義之

古非詞句之古有明潛溪遵嚴荆川震川其文詞之近時者甚多不以此損其古意于麟元美字句之古幾於無一

欽定四庫全書總目卷一百八十五

集部

別集類存目十二

三

不肖而終與古遠觀其持論可以見其宗旨矣

家香草堂集四卷

檢討蕭芝家藏本

國朝劉元燮撰元燮字孟調湘潭人雍正庚戌進士官至山西道御史祿事降廣西布政司經歷所著有捫學齋集

梅垞吟篇什頗多是編古今體詩僅二百餘首乃其晚年所自訂也

金管集一卷

江蘇巡撫探進本

國朝顧成天撰成天有離騷解已著錄其所作詩凡二千餘首嘗以質於蔡嵩嵩為摘其中有關世教者八十三

首鈔為此集題曰金管用業元帝事也

花語山房詩文小鈔一卷附三重賦一卷燕京賦一卷

江蘇巡撫探進本

國朝顧成天撰是集乃雍正庚戌辛亥二年成天侍直內廷時所作花語山房即苑外直廬名也凡詩六十

八首文二十三首以歲月先後雜編不分體裁又三重賦一卷成天為諸生時恭逢聖祖南巡所獻燕京賦一

卷併自註則雍正癸卯成天赴京會試時作也

桑陵甫集八十四卷

浙江巡撫探進本

國朝桑調元撰調元有論語說已著錄是集詩十四卷續集二十卷五嶽詩二十卷文三十卷調元才鋒踔厲學

問亦足以副之故詩文縱橫排奐擺落蹊徑毅然自為一家而恃其才學不主故常豪而失之怒張博而失之蔓

行者亦時有之所作鎮海樓詩至七言長律二百韻古人無是格也其所以長即其所以短乎

柯椽集一卷

侍講劉亨地家藏本

國朝周宣猷撰宣猷字辰遠長沙人雍正癸丑進士官至浙江鹽運通判是集凡雜文五十七篇駢體及賦亦參

錯其間前後亦無序跋似乎未定之槩其後人錄之成帙也未附陳兆壽所作傳一篇載宣猷所著尚有史斷史

記雜字南北史瀨眠雲集采中雜韻卷施小章諸編集中又有風鈴餘韻自序一篇亦所作詩集今惟卷施小章

及此集存餘皆未見

雪舫詩鈔八卷

侍講劉亭
地家藏本

國朝周宣猷撰其詩自乾隆辛未迄丁丑分年編次前七卷名卷苑疏小草後一卷則

南巡紀盛

皇太后萬壽

詩各三十首

柳漁詩鈔十二卷

浙江巡撫
採進本

國朝張澗撰澗字鷺洲錢塘人雍正癸丑進士官至給事中是編分子野雞木瓶景瀆行癡牀海槎帖懷院游鶴
風蟄恥十集澗與金志章厲鶚等以詩相鏃厲故集中與諸人唱和為多

秋水齋詩集十五卷

浙江巡撫
採進本

國朝張映斗撰映斗字雪子烏程人雍正癸丑進士官翰林院編修是編凡十四集首日或可存集次江上集次
釣磯集次雲林集次范湖集次日下集次水鏡集次新館集次內舍集次新館後集次舊雨集次清祕集次瀛臺
集次使屋集皆其子守約守愚所編前有湯右曾序作於康熙乙未蓋其早年即為右曾所賞識也

寧遠堂詩集一卷

侍講劉亭
地家藏本

國朝朱成點撰成點字司衡寧鄉人此集其所自編自序有云遵徙流離至庚子疾中閉門卻軌始多作詩以自
遣而集中又有己酉下第詩蓋老於諸生者也

松桂讀書堂集八卷

江蘇周厚
堉家藏本

國朝姚培謙撰培謙字平山華亭人喜刻巾箱小本亦好事之士所著有春帆集刻於康熙庚子自知集刻於雍
正甲辰樂府及覽古詩刻於乾隆己未此本乃乾隆庚申哀合諸編刪為一集培謙自為之序其諸集序亦仍列
之於卷端

舒曠齋存彙三卷

山東巡撫
採進本

大定四年

集部

別集類存百十二

四

國朝黃溶撰溶字浩遠鄆城人雍正中貢生是集凡詩二卷詞賦其一卷皆未合古人尺度蓋鄉曲無師之學也

桐陰書屋集二卷

山東巡撫採進本

國朝朱崇勳撰崇勳字彝存號怡園歷城人其詩沿新城末派清脫有餘而深厚不足

湖上草堂詩一卷

山東巡撫採進本

國朝朱崇道撰崇道字帶存崇勳弟也其詩如寒煙依樹澹餘雪傍山明樵響通澗底人影上蘆花頗有思致然寥寥數篇不成卷帙

蠶桑樂府一卷

江西巡撫採進本

國朝沈炳震撰炳震有九經辨字澗蒙已著錄此乃其增歎齋詩集之一種自護種至賽神凡二十首皆七言長句蓋欲以當蠶畢報賽之曲也

無悔齋集十五卷

浙江巡撫採進本

國朝周京撰京字西穆一字少穆錢塘人雍正中諸生是集為同里厲鶚所定分年編次附錄全祖望所撰墓誌銘及同人掃墓詩鴛序以高岑豪健比之今觀其詩源出劬南在一時詩社中酒旗茗椀拈韻分題亦足傾倒流輩若方駕古人則又當別論矣

實嬾齋詩集四卷

浙江巡撫採進本

國朝張時泰撰時泰字平山號六可嘉興人官桐城縣知縣是集前有時泰自作實嬾先生傳頗以曠達開通自許傳末系以詩曰嬾送窮愁嬾願身嬾趨權貴嬾千人嬾尋枯句每經日嬾作報書恆幾句幽賞嬾殊辜景物遊嬾已絕風塵嬾眠嬾起情如醉十嬾先生嬾是真其詩格大抵似此也

亦廬詩集二十八卷

江西巡撫採進本

國朝湯斯祚撰斯祚字衍之號亦廬南豐人雍正中以歲貢生官江西新昌縣訓導是集以編年為次其居家則

有起述書堂草若柯山房草游楚則爲匡廬山草沔陽草泊歸而復出則有茗柯山房後草崇真禪院草沉湘草充貢以後則有北征燕山南轅諸草爲學官以後則爲安豐草俸滿草回任草安豐後草其詩筆力頗爽健惟功候未深耳

芝壇集二卷

山東巡撫採進本

國朝張鵬翼撰鵬翼有芝壇史案已著錄其詩文皆以講學爲宗體格多近於語錄

江湖閒吟八卷

福建巡撫採進本

國朝王道撰道字直夫漳浦人官金山縣知縣卷首有黃之雋序稱所著有鹿阜文集有京華彙今未見此集題曰江湖閒吟乃其罷官後寓居朱涇所作其版心則題曰鹿阜詩集蓋其集總名鹿阜以詩文分集而詩集之中此爲一種也據所自述初學李夢陽後乃變以王維陸游然先入者爲主矣

慎獨軒文集八卷

浙江巡撫採進本

國朝劉青霞撰青霞字嘯林襄城人雍正中諸生是集皆散體雜文前有王心敬所作小傳稱其酷愛司馬遷班固書未嘗釋手今集中有小傳一卷史論一卷蓋亦留心史學者也

屏守齋遺彙四卷

江西巡撫採進本

國朝姚世銓撰世銓字玉裁號意田歸安人平生學問以何焯爲宗故全祖望爲其墓銘曰意田之學私淑義門義門之徒莫之或先人亦有言墨守太堅意田不信禦侮兀然每逢異幟互有爭端焦唇敝舌各尊所聞紀其實也祖望誌又稱馬曰瑑張四科收拾其遺文開雕又稱所著爲蓮花莊集八卷此本書名卷數皆與誌不合未有張四教政稱勅爲詩文各二卷則又無所闕佚不知何故也

蘊亭詩彙一卷

江蘇巡撫採進本

國朝金挺撰挺字連城先世居廣東挺移居於江南遂爲吳縣人是集爲其子祖靜所編前有錢維城序稱其詩

派出自嶺南少年至京師秋日游靈佑寺有高雲不碍靜晴日自知寒為新城王士禎所賞又附載舊評數條其
一條云才不富卻有氣如表曼舞劍非行陣之才而亦能令吳道子長筆力思不苦卻自深如帝釋天人不能參
扣闥大迦葉語亦一一入真法藏語格欲正卻亦別如蜀漢南唐稱名甚正論其立國固是偏隅亦頗得其似云
翰村詩彙六卷編修周永年家藏本

國朝仲昆保撰昆保字羹梅號翰村常熟人是集前五卷為昆保所自編皆題曰行卷第一卷曰辛集第二曰壬
集第三曰癸集第四曰甲集第五曰後甲集案唐時進士以所業投贊當路謂之行卷見於披言等書者頗詳昆
保終老山林而名所作為行卷未喻其說又文集以甲乙標目始於文選諸賦其兩集分甲乙者為李商隱樊南
集一集以甲乙分卷者為陸龜蒙生澤叢書然皆以十千為次是集獨以辛壬癸甲為次亦莫明其故第八卷題
曰遺集則乾隆癸亥昆保旅卒於博山其友趙念所續編也昆保初學詩於同里馮武武馮班從子也故其詩格
律色澤皆馮氏法康熙辛丑復北至益都從趙執信受學故其詩運意鏗刻則純用趙氏法云

梧江雜詠一卷編修汪如藻家藏本

國朝劉雲峰撰雲峰字秋冶南昌人是編取梧州風景古蹟為竹枝詞四十五首各附註其下亦頗詳悉然皆因
仍地志之舊文無所考辨

在亭畫彙二十卷江蘇巡撫採進本

國朝李果撰果字碩夫長洲人在亭其號也是集凡雜文十二卷後附詠歸亭詩鈔八卷果之論文謂舟州北地
太古而患乎似義烏延陵文真而患乎淺欲救似與淺之病惟在讀書窮理故所作頗有矩矱而墨守太甚亦未
能變化也

樸庭詩彙十卷編修吳詩昌家藏本

國朝吳煥文撰煥文字璞存一字樸庭會稽籍山陰人雍正中國子監生屢舉不第生平游歷一寄諸吟咏前四

卷其友人嚴遂成所選後六卷則晚年所自訂也

孤石山房詩集六卷 浙江題編 採進本

國朝沈心撰心字房仲仁和人雍正中諸生早從查慎行游其詩亦頗有查氏法

抗言在昔集一卷 江西巡撫 採進本

國朝沈亦壺撰亦壺字心玉山陰人是編皆咏古七言絕句而多考證文史與他家詠古評論事蹟得失者又則其學識頗為拔俗而有意示高或流於誕如論帝魏帝蜀一條洞見宋人之癡結論蘇氏父子之文自相矛盾一條足關其口論續通鑑綱目諸條皆頗公允論岳飛女銀瓶一條極有根據羊祜周恭帶二條亦頗有推闡至於以司馬遷之先黃老後六經為是以王充論衡欲藉諸子正經之誤為識在董仲舒上以莊子荀子為兩大儒以老子配論語莊子配易管子配書離騷配詩荀子配禮史記配春秋續為沈氏六經謂管子地員篇班固地理志伯仲禹貢而周禮職方有愧色皆未免有意駭俗不為定論其論劔俠傳之詩似矣不知劔俠傳本無是書乃明人鈔太平廣記二卷為之其論尤倉子為影撰似矣不知為王士元所補士元作孟浩然集序自言其始末最明頗為失考又如 國朝詩人自王士禛朱彝尊田雯梁佩蘭宋琬諸人無一不肆詆排 國朝文人自黃宗羲毛奇齡汪琬姜宸英王源方苞諸人無一不遭指摘或加以醜詈至謂其不堪供唾且謂此外寥寥自鄙無識其意欲於百餘年中以第一人自命尤放誕矣

二須堂集二卷 戶部尚書王 際華家藏本

國朝丁詠淇撰詠淇字瞻武號紫濱居士錢塘人是集為詠淇所自編二須者取諸葛亮學須靜才須學語也上卷書十二首序十九首下卷記一首傳六首論二首辨一首說四首題跋五首書事一首家訓十八則其中知希子傳未聞其人意為自寓之詞歎文雖不甚人古格而頗以扶持名教為主集中別有仰編序蓋其筆記又有彙讀詩鈔序為其詩集今皆未見

大定四年...

集部

別集卷目十二

六

雙樹軒詩鈔一卷

編修李中簡家刊本

國朝僧湛性撰湛性一名湛汎字藥根又曰葯菴本丹徒徐氏子居揚州之祇園菴故其詩卷亦自署為江都初

自刻所作為葯菴集沒後其版散佚此本乃乾隆壬辰所重刊也其詩宗法王士禎惟沿溯於士禎唐詩十選之

中故結體修潔時有雋語如所謂春風拂禪衣流鶯啼樹杪二月青滿林百花開已早者亦頗近自然然骨力未

堅與象頗淺十首以外語意略同蓋聰明多而學問少故流連光景所就止於如斯耳

香域內外集十二卷

兩淮馬裕家藏本

國朝釋敏齋撰敏齋蘇州花山翠巖寺僧是集乃其弟子聖葉等所編外集詩文凡七卷內集五卷皆語錄偈語

蓋釋家以釋為內學儒為外學耳

敲空遺響十二卷

內府藏本

國朝僧如乾撰如乾字慈休四川人嘗主陝西興善燧燠等寺是集凡雜文八卷詩四卷

香秀集二卷

浙江巡撫採進本

國朝黃千人撰千人字證孫餘姚人宗羲之孫百家之子也官泰安縣丞是集為其同官覺羅普爾泰所刊前有

普爾泰序又有顏懋价序引嚴羽王士禎之說皆譽館閣之士以抒其憤懣价字介子曲阜人以貢生官肥鄉教

論老而不第故其詞如是云

梯青集

無卷數 懷討 潘之家藏本

國朝項大德撰大德字立上漢陽人刳股療母不愈以哀毀卒是集凡賦二十七首詞四十一首吐屬頗韶秀而

得年僅二十有六功候未深故骨格未能成就焉

月湖磨棊一卷

江西巡撫採進本

國朝王樑撰樑有讀畫錄已著錄是集僅文二十四首又多小品蓋擅明季山人之遺風鈔本題曰月河磨棊考

集內所居丙舍地名皆作月湖襟別有讀畫錄亦載張庚爲作月湖圖則卷首月河字鈔本誤也

夢村集二卷

編修周永年家藏本

國朝朱緯撰緯字義俶歷城人由歲貢生官邱縣訓導是集有七十自壽詩又有次兒生日詩作於七十四歲時蓋其晚年所自編詩頗清淺而時有脫灑之致

後海書堂遺文二卷

江蘇巡撫採進本

國朝王孝詠撰孝詠有傾西雜錄已著錄是集上卷爲雜文下卷皆金石題跋文頗質實而少覺其樸惟題跋則品題不苟可取者多

薇香集一卷燕香集二卷燕香二集二卷

內閣中書方維甸家藏本

國朝方觀承撰觀承字退毅號問亭又號左田桐城人由監生薦授中書舍人官至直隸總督諡恪敏觀承遭遇聖朝備蒙恩眷封疆宣力積有勤勞而性嗜詩篇政務之餘不廢吟詠舊所著有東園剩藁入塞詩懷南草

豎步吟叩舩吟冷田巢窠看鸞詞松漠草共八種皆編入述本堂詩集中已別著錄是編三集則其爲直隸總督時所作其子維甸編錄別行者也

晚晴樓詩草二卷

大理寺卿陸錫惟家藏本

國朝曹錫淑撰錫淑字采符上海人兵科給事中一士之女適同里舉人陸正笏一士有四焉齋詩集其妻陸鳳池亦有梯仙閣餘課錫淑承其家學具有軌範大致以性情深至爲主不規規於儷偶聲律之閒云

藍戶部集二十六卷

江西巡撫採進本

國朝藍千秋撰千秋字長青宏黃人以薦授國子監學正官至盛京戶部員外郎是集刻於乾隆丙寅凡詩四

卷文二十二卷

豐川全集二十八卷

內府藏本

大定四庫全書

集部

別集類存百十二

國朝王心敬撰心敬有豐川易說已著錄此集乃所語錄及雜著大抵講學者居多乃康熙丙申湖廣總督額倫特所刊額倫特即嘗以隱逸薦為心敬者也

豐川續集三十四卷 陝西巡撫探進本

國朝王心敬撰據其子勅凡例稱心敬康熙丙申刻有正續集二十八卷是已有正續兩集矣又稱自丙申至乾隆戊午與當代大人君子相酬答及與門人子弟講說論辨者視前刻倍多今夏成三十四卷是此本又出續集後矣然其二十八卷之本實不分正集續集之目未喻何說故此本仍刊版之名以豐川續集著錄焉

綠筠軒詩四卷 編修周永年家藏本

國朝張元撰元字殿傳淄川人雍正丙午舉人官魚臺縣教諭元為崑崙山人篤慶從子故詩法本王士禎之論以神韻為宗晚乃漸歸朴老而終未忘其故轍是集凡七百餘首其孫庭案所刻也

質園詩集三十二卷 編修程晉芳家藏本

國朝商盤撰盤號蒼雨又號寶意會稽人雍正庚戌進士官翰林院編修以養親乞外補改授同知終於元江府知府盤與錢塘厲鶚名價相埒才情高瞻生平篇什甚多此集乃刪汰之餘尚三千首云

竹香詩集四卷 大理寺卿陸揚熊家藏本

國朝席蓆撰蓆字景溪常熟人雍正己酉舉人官內閣中書蓆為吳偉業外孫於詩法頗有端緒此集凡詩三百餘首乃其友杭世駿所刪存也

冰壑詩鈔六卷 編修周永年家藏本

國朝朱令昭撰令昭字次公歷城人少與淄川張元膠州高鳳翰等結柳莊詩社繪畫篆刻皆能謂意其詩亦與鳳翰相伯仲而少遜其雄傑

鴛浦集六卷 編修周永年家藏本

國朝朱懷袞懷樸字素存歷城人其詩格近宋人而時有風致

菱溪遺草一卷編修程晉芳家藏本

國朝蔣麟昌撰麟昌字靜存陽湖人乾隆己未進士官翰林院編修年僅二十有二而歿遺詩數十篇其父原任

倉場侍郎炳為刻而傳之

松泉詩集六卷編修程晉芳家藏本

國朝江昱撰昱有尚書私學已著錄其平生喜為韻語與編修程夢星等相唱和游蹟多在衡湘間是集即刻於

湖南者也

閩房集一卷編修程晉芳家藏本

國朝陳珮撰珮字懷玉天長人江都諸生江昱之妻是集僅詩四十首長短句十首附以傳誄及昱所作墓碣

白雲詩集七卷別集一卷兩江總督採進本

國朝盧存心撰存心原名琨字玉嚴別字敬甫錢塘人思貢生乾隆元年嘗薦舉博學鴻詞是集首以文廟從祀

弟子贊八十首殿以詠梅七言律詩八十五首前有彙調元序稱為總角交其才氣亦調元之亞也

萬青樓詩文殘編一卷國子監助教義羊家藏本

國朝邵昂霄撰昂霄有萬青樓圖編已著錄所著詩文名萬青樓棄身後散佚是編為其從子是柎所手錄僅存

文數篇詩數首而已

隨園詩集十卷附錄一卷御史戈源家藏本

國朝邊連寶撰連寶字趙珍今刊本作肇珍乃戲以同音書之如申涵光本字符孟而每書冕盟非其本字也任

邱人雍正乙卯拔貢生乾隆丙辰薦舉博學鴻詞辛未又薦舉經學是集前有乾隆丁丑戈濤序而第四卷以下

題曰病餘草者乃皆戊寅以後詩蓋續編而仍冠以原序也附錄一卷曰禪家公案頌則其晚耽禪悅讀指月錄

欽定四庫全書總目 卷一百八十五

所作云

隱拙齋集五十卷

浙江巡撫採進本

國朝沈廷芳撰廷芳有十三經注疏正字已著錄是集為廷芳所自編凡詩賦三十二卷散體文十八卷其詩學

出於查慎行古文之學出於方苞故所作雖無鉅麗之觀而皆有法度

東山草堂集六卷

江西巡撫採進本

國朝潘安禮撰安禮字立夫南城人乾隆丙辰 召試博學鴻詞官翰林院編修是編皆其官京師時所作律賦

凡三十九首其門人為註而刻之

黃靜山集十二卷

江蘇巡撫採進本

國朝黃永年撰永年字靜山江西廣昌人乾隆丙辰進士官至常州府知府是集前有雷鉉所作墓誌銘稱所著

有希賢編春秋四傳異同辨松甫文類南莊類彙白雲詩鈔靜子日錄此本僅南莊類編彙八卷白雲詩鈔一卷

奉使集一卷靜子日錄一卷而他集不見其春秋四傳異同辨今在南莊類彙第二卷中亦不別為書未喻其故又

一別本僅有南莊類彙奉使集靜子日錄三種疑其隨刻隨印皆非完本云

山陰集一卷歸田遺草一卷

編修鄭際唐家藏本

國朝林其茂撰其茂字培根侯官人乾隆丙辰進士官山陰知縣此二集一為官山陰時作一為罷官後作其茂沒

後其婦弟鄭天錦所編冠以魯曾煜所作家傳又有沈廷芳序惜其遺疾早世未克竟其所長蓋其茂沒時年僅三

十有九云

史復齋文集四卷

陝西巡撫採進本

國朝史調撰調字勻五號後齋晚號雲臺山人華陰人乾隆丙辰進士官仙游縣知縣是集一卷為其官仙游時稟

論及荒政義倉等略二卷為序跋書論三卷為橫渠書院規論及論子書而以仙游所定求士三則冠焉四卷為

語錄及功過式併以崔紀所作誌銘附於其後

瑜齋詩草一卷

廣吉士盧進家藏本

國朝郭趙璧撰趙璧字名璣侯官人乾隆丙辰舉人是集乃趙璧沒後其子文煥所編後其子文海又搜求佚藁

附益之凡古今體詩一百一十一首蓋趙璧喜吟詠而不自收拾故散失之餘所存僅此云

卓山詩集十二卷

江西巡撫採進本

國朝帥家相撰家相字伯子奉新人乾隆丁巳進士官至潯州府知府是集又名三十乘書樓集中多改竄之處

蓋猶其自訂之原本也

瓠息齋前集二十四卷

浙江巡撫採進本

國朝凌樹屏撰樹屏字保釐烏程人乾隆己未進士官鳳縣知縣調咸陽後改補嘉興府教授是集賦一卷詩二

十三卷分十二集大抵才情奔放之作

問義軒詩鈔二卷

國子監助教張養年家藏本

國朝莊綸渭撰綸渭字對樵號葦塘武進人乾隆壬戌進士官定海縣知縣是集為綸渭所手定其子世驥校刊

賸草乃其在定海時所著雜文及案牘已載入定海續志又別錄成帙附於詩集之後焉

詠史六言一卷

侍講劉字地家藏本

國朝周宜武撰宜武字變軒長沙人乾隆壬戌進士是編雜採史事以六言絕句評論之或一首詠一事或一首

連類兩三事不分門目亦不敘時代後先每首之末各附論一篇六言一體古今作者頗少詩家偶一為之避其

難也宜武獨衍至百首以外意欲闢道出奇然終不能見長也

月坡詩集四卷

福建巡撫採進本

國朝郭植撰植有經史問已著錄是集分四編一曰雪竹草堂集一曰北游集一曰臺江草一曰溫陵草以集中

大定四庫全書總目卷一百八十五

集部

別集類存目十三

九

編年考之迄於辛酉蓋其鄉試中式之後所刊也

玉芝堂集九卷

江蘇巡撫採進本

國朝邵齊謙撰齊謙字荀慈昭文人乾隆壬戌進士官翰林院編修是集凡詩三卷文六卷乃其晚年所自定詩文皆不分體大抵駢偶之作為多為四六之文者陳維崧一派以博麗為宗其弊也膚廓吳綺一派以秀潤為宗其弊也甜熟章藻功一派以工切細巧為宗其弊也刻鏤纖小齊謙欲矯三家之失故所作以氣格排異色澤斑駁為宗以自拔於蹊徑而斧痕則尚未渾化也

類真初集詩選八卷

江蘇巡撫採進本

國朝張用天撰用天字用六號誠菴婁縣人是集刻於乾隆甲子有用天自序其詩氣體勻整而捶字往往未墜句法亦多沿襲如板橋吟中紅歸水上桃花簇青入煙中柳葉齊則直點竄杜南句矣

燕川集六卷

江蘇巡撫採進本

國朝范泰恆撰泰恆字無厓河內人乾隆乙丑進士改庶吉士外補崇義縣知縣此集皆其所為古文後附其祖父墓表祖母壽序皆他人作而未又綴以泰恆代文六篇編次不倫疑墓表壽序即泰恆自作嫁名於人後仍收之集中耳然究非體例也

傲帚集二卷附蘆中集一卷

國子監助教兼年家結本

國朝趙秉忠撰秉忠字景光號秋聖興化人乾隆乙丑進士改庶吉士未散館而卒是集皆古今體詩末附蘆中集乃哭其子春祈而作也

凝齋遺集八卷

江西巡撫採進本

國朝陳道撰道字紹洙號凝齋江西新城人乾隆戊辰進士是集為其子守誠等所刊凡文六卷詩二卷中頗多講學之作

柘坡居士集十二卷

浙江巡撫探進本

國朝萬光泰撰光泰字循初秀水人乾隆庚午舉人是集其所自定卷一曰南村草堂集卷二曰樂于集卷三卷四曰聞魚閣集卷五曰北郭草堂集卷六卷七曰江船集卷八曰聞魚閣續集卷九曰孤屋集卷十曰江船續集卷十一曰五上春司集卷十二曰青乳軒集前有汪孟錡序稱循初計借北上以病卒方病中嘗自定詩十二卷一紙寄余有可存則付令子存之不者燬之之說又稱刻既成取循初別字題曰柘坡居士集其古文詩餘極夥聞手自燬去外雜著十六種則皆其自定紙寄者俟他日續刻云云蓋光泰才思富瞻篇什頗多後乃悔其少作所存止此也

浩波遺集三卷

歷吉士樂上國家藏本

國朝鄭際熙撰際熙字大純侯官人乾隆丙子舉人年三十六而卒是集為其弟際唐等所刊凡詩二卷文一卷文中有杜律篇法序一篇稱能詩者未嘗先言法而自中法且神而明之變化以自成其法未有案一定之科條而譜之舍其性情才力俯首以從法也其論亦足破拘攣之說其書則未之見也

觀光集五卷

浙江巡撫探進本

國朝蔡以封撰以封字桐川嘉善人由優貢生官桐鄉訓導是集凡古今體詩八十五首擬樂府四十六首皆其監敷文書院恭逢 聖駕南巡率諸生迎 駕時所賦也

線衫野屋集四卷

浙江巡撫探進本

國朝徐以泰撰以泰字陶尊德清人國子監生乾隆二十二年官揚州縣知縣其詩皆早年之作故骨格未就而時有雋句如詠鷹翎扇附人終在手斷翻尚生風一聯亦頗工點染也

強恕齋文鈔五卷

浙江巡撫探進本

國朝張庚撰庚有通鑑綱目釋地糾繆已著錄庚少孤貧賣畫養母以餘力為古文是集乃其七十三歲所自編

中傳誌之文居十之七多述忠孝節義之事

冬心集四卷

江蘇巡撫探進本

國朝金農撰愚字壽門錢塘人客於揚州書畫皆以奇逸自喜詩亦如之其名冬心者取崔國輔寂寥抱冬心之

語也

產鶴亭詩集七卷

浙江巡撫探進本

國朝曹庭棟撰庭棟有易準已著錄是集凡分七彙每彙各為小序其書齋中有產鶴亭因以名集故集中詠鶴

詩最多其第二彙別題曰魏塘紀勝第七彙亦別題曰續魏塘紀勝蓋曹舊諱嘉興路為魏塘鎮亦名武塘明

宣德五年始析為縣庭棟先詠其名蹟為一百首又續成五十首也

西澗草堂集四卷

編修周永年家藏本

國朝閻循撰循有尚書續記已著錄是編其所著古文也其文謹嚴頗不苟作循觀沒後其同學韓夢周為

搜輯編次序而刊之僅五十七篇

煙嶠山人集八卷

禮部主事任大椿家藏本

國朝汪舸撰舸字可舟婺源人流寓揚州性不諧物偃蹇貧病以沒是集為舸所自定斷自五十歲以後乾隆庚

寅杭世駿為之序併附錄世駿與沈沃田書盛稱其和丁隱君貝葉經歌長春觀老子像絕句云

曉巢集六卷

江西巡撫探進本

國朝李錡撰錡有尚史已著錄錡卜居盤山優游泉石以終故其詩意思蕭散挺然拔俗大都奇石之態

而刻意求高務思雅脫亦往往有剗削骨立斧鑿雷痕較王世貞所謂高叔嗣詩如空山鼓琴沈思忽往木葉盡

脫石氣自青者則猶有一閒之未達蓋可以著力之處精思者得之不容著力之處精思者反失之也第一卷皆

擬古樂府古人音節既不可得乃詰屈其詞以意為之題下所註如朱礪下註曰建鼓殷所作樓翔鸞於上或曰

警鼓精此吳兢解題本說也臨高臺下註曰趨帝鄉而會瑤臺也借寓游仙已非原解雉子班下註曰關雎之類則純非古題之意又不知其寓意所在卷中大抵類此殊不可解也

石閨詩一卷

江西巡撫探進本

國朝陳景元撰景元號石閨鑲紅旗漢軍生平作字效晉作詩效漢務欲自拔於流俗之上是集乃其手書擬古詩六十餘首以貽雷銓者前有短札亦其手書鈔茲鈎摹筆蹟刻之紙版頗為精好景元詩雖以漢為宗而性既孤僻思復刻峭結習所近乃在孟郊賈島之間如米摹晉帖矩度不失二王而波勒鉤剔乃時時露其本法於漢人不彫不琢之意未能全似也此本以篇頁較少不能成帙舊附於李鶴隄集集以行然二人同時唱和名亦相齊未可列諸附綴故仍各著於錄焉

南阜山人詩集七卷

山東巡撫探進本

國朝高鳳翰撰鳳翰字西園晚自號南阜山人又曰歸雲老人膠州人嘗以縣丞署壩鹽大使患風痺罷歸卒風翰工於書畫筆墨脫洒不主故常風痺後右臂已廢乃以左臂揮酒益疎野有天趣間作詩歌不甚研鍊往往類唐自放亦不甚局於繩尺然天分絕高興之所至亦時有清詞麗句故少時以詩誦王士禛極稱賞之生平所作凡三千餘首曰繫林集曰湖海集曰岫雲集曰鴻雪集曰歸雲集曰歸雲續集曰青蓮集晚年貧病且死自跋其後曰盲子頑孫篋笥誰付不知後來所作尚復幾許亦不知得成卷與冊否尚有人拾取於蛛絲蠹腹之餘以少得流傳於人世否露電茫茫老病日篤死且不知何時而猶惓惓於此故紙篋中物愚哉南阜不直達人一笑矣其志亦可哀也

拙齋集一卷

編修周永年家藏本

國朝李遠撰遠字君宏益都人是集皆五七言近體吐屬亦頗恬雅其刊版字畫悉從說文以小篆改隸詭形怪態則殊為好異

欽定四庫全書總目卷一百八十五

集部

別集類存目十二

密娛齋詩藁一卷

編修周永年家藏本

國朝邵汝功撰汝功字謙持聊城人乾隆乙未進士傳臚後即病歸未及釋褐而卒是集乃其友桂林府同知李文藻所刊文藻序稱其古醇出於韓蘇近體似錢即皆非止境蓋其天分頗高而得年不永功候則尚未成就云

放鶴村文集五卷

山東巡撫採進本

國朝張何撰何字同人一字石民諸城人是集前有方邁所作何小傳稱其有孝行多奇節蓋亦孤高之士其文則欲擺脫町畦乙乙冥冥別標象外之趣而反墮公安竟陵派中蓋存一不落窠臼之意即其臬曰矣

東坪集八卷

浙江巡撫採進本

國朝胡慶豫撰慶豫字離來號東坪平湖人歲貢生是集卷一曰南浦吟各江右時所作卷二曰昭陽小寨客邗江時所作卷三曰北征集赴京道中及寓京師時所作卷四卷五曰西征草入關中及流寓西蜀時所作卷六卷七卷八曰桐軒集則里居所作也其詩以雅淡為宗而未敢趨詣

六湖遺集十二卷

浙江巡撫採進本

國朝張文瑞撰文瑞字雲表六湖其號也蕭山人官青州府同知其詩凡十八集其私印曰少陵私淑又曰五言長城自命頗高所作則大抵以秀潤為工也

金西堂詩集八卷

陝西巡撫採進本

國朝王令撰令字仲錫渭南人由拔貢生官至廣東按察使是編分金石絲竹匏土革木八集自序謂皆適性自樂之言蓋沿波鍾譚全非慶陽武功以來秦中舊格矣

古雪堂文集十九卷

浙江巡撫採進本

國朝王令撰是編乃其所著雜文詞多蹇澀似沿其鄉文翔鳳餘派又好用釋典頗雜宗門語錄所作詩話如紀隴西施妙玉在冥中代高素臣作詩還魂遂為夫婦事亦多類唐人說部也

有蘭書屋存彙四卷

江蘇周厚培家藏本

國朝石球撰球字鳴虞嘉定人其近體詩頗有風致而骨格未堅徐樹紳序稱球自以生平蹤蹟少所涉歷無現
偉奇特之觀故亦罕沈博絕麗之作可謂自知矣

寒玉屏集二卷碎金集二卷

浙江巡撫採進本

國朝閩南仲撰南仲字湘人號石漁湖州人其詩以新穎為宗體格頗近金元

薪槁集四卷

江蘇巡撫採進本

國朝許昌國撰昌國字仔唐原字一清荆溪人歲貢生是書首雜著次論學次論古次課徒訓兒各為一卷大抵皆語錄之類後集一卷則附錄也未有其子重炎所作年譜案其事狀蓋亦篤行好修之士故集中講學之語多能切實近理特不以著作見長耳

璞堂文鈔十一卷

江蘇巡撫採進本

國朝許重炎撰重炎字少來荆溪人是集多講學之文而持論平允無喧爭門戶之習於忠孝節義尤瞻瞻表章亦非空談性命自號聖賢者流文則縱橫曼衍惟意所如不能一一入格也

禹門集四卷

內府藏本

國朝郭振遐撰振遐字中洲汾陽人寄居揚州詩頗率易至以大禹顏回自比尤為狂縱矣

彙書六卷

浙江巡撫採進本

國朝王鳳九撰鳳九仙游人是集自序謂倣笠澤叢書之例故以彙書名之中多講易之文其說皆宗程朱詩則

有韻語錄也

天門詩集六卷文集六卷

內府藏本

國朝吳盛藻撰盛藻字觀壯和州人由拔貢生官至廣東按察司副使其詩文皆惟意所如罄所欲言而止

歲寒堂存彙一卷

浙江巡撫採進本

國朝林瑤撰瑤字鹿巷錢塘人是集皆其所著雜文僅數十篇相其版式蓋陸續開雕尚未編定成帙其安溪懷古序信建文出亡為真殊為未考所記顏允紹郭少尹等事皆足禪史之闕特敘述稍冗筆力稍弱耳

天香閣詩集十卷

浙江巡撫採進本

國朝唐之鳳撰之鳳字武會烏程人其詩多愁苦之音擬古諸作亦頗具體然未能變化末附碎玉合編二卷一題唐雲禎字兼著一題唐德遠深源著蓋之鳳兄弟行也

笑門詩集二十五卷

內府藏本

國朝戚珥撰珥字後升泗州人由優貢授知縣所作好為新語公安竟陵之流派也

偶存草堂集六卷

山東巡撫採進本

國朝林之蒨撰之蒨字素園楊夢琬序稱其產於魯客於楚其自署曰孝感蓋篤籍也其取法在中唐南宋之間

而學力則未逮焉

右別集類一千五百六十七部一萬七千六百十四卷

內六十六部無卷數

皆附存目